

Melekizedeki Ogu N'oha?

Jeffersonville, Indiana, USA
Okwakabiri 21, 1965

1 Reka twinikye emitwe yaitu ahabw'okushaba.

Taata Omukundwa ow'omu Iguru, nituhurira ekyeshongoro eki kya Ikiriza kwonka, nikituma twamanya ku eki kyonka nikyo tushemereire kukora kuhungura ebyaraganisiibwe byona bya Ruhanga, okubiikiriza kwonka. Ahabw'okuba kikahandiikwa ngu, "Byona nibibaasika ahari abo abarikwikiriza." Obwo nitugamba munonga, nk'omuntu oriya owaabaire aine omwana orwaire entsimbo, "Mukama niinyikiriza! Onkize obutaikiriza bwangye."

Nitukusiima ahabw'obushoboerozi Bwawe bukuru, okweshuurura Kwawe kukuru ahariitwe omu biro ebi eby'aha mperu. Nikireetera omutima gwaitu kushemererwa munonga n'okwesiima, okumanya ku tukwataniise na Ruhanga ohuriire; Orikukyoreka omu mubiri, obujurizi bw'ebintu, nk'oku Yaakozire omu biro ebyahingwire, kandi nk'oku Yaaraganiise ahabw'ebiro ebi. Nitukusiima munonga, Ruhanga waitu. Ebiro ebi eby'omwirima ahu kirikureebeka ngu tihariho n'omwe orikumanya omuhanda gw'okutooramu, tushemereirwe munonga ahabw'okutunga obuhungiro, bw'okuhungiramu.

Hati tuhe omugisha ekiro eki, Mukama, twaba nitugamba Ekigambo Kyawe. Kandi n'ebyaraganisiibwe ebituhairwe, nkaabaasibwa ki tubirindira omu mitima yaitu, tubikunda n'ekitiinisa, kandi tubyorobera n'emicwe erimu okutiina Ruhanga buzima. Ahabw'okuba nitukishaba omu Iziina rya Yesu. Amiina.

2 [Haagira owaagamba n'Ow'eishe-emwe Branham -Omur.] Obuyambi? Baabaire batashemereire-baabaire batashemereire kukora ekyo. Okikozire n'oha? Mwashobby? Nkabukiire manegya. Angizire ngu anshororeize obuyambi. Abaire atashemereire kukikora. Ninkisiima, Ruhanga naakimanya, kwonka, ti-tinyizire ahabw'ekyo. Mwebare. Mukama abahe omugisha. Ninja kukora kyona eki ndikubaasa. Ninja kubukozesa omu kubuurira kw'omu nsi z'aheeru, mbone kumanya ku bukozesiibwe habw'Obukama bwa Ruhanga. Kandi Mukama ku araasiime, Ninja kubutwara, nyowe nyenka, omu nsi ezo, kureeta engiri egi yonyini ei mubaire mushutami, nimuhuririza saabiiti egi, obwo nimmanya ngu nikiza kukorwa nk'oku Mukikiiriize. Mukama ampwere kukikora.

Ninsiima munonga ahabw'okwija kwanyu omu bwingi saabiiti egi, kandi n'ahabwanyu mwena bantu 'mwe abahurikiize aha masimu ekiro eki omurundi ogundi hamwe na-n'aha waaya z'amasmu. Kandi nitusiima ahabwa buri omwe omuriimwe.

3 Billy angambiire akasheeshe aka, yaagira ati, "Taata, kuri oizire naanye akasheeshe aka, kare, bwaheza kusheesha, okeemerera hanu omu myanya egi okareeba ba nyina b'abaana nibagaburira abeereere baabo omu motoka, abantu abo abooro bashutami omu njura egyo, barinzire enyigi okwigurwaho!" Nooreeba oku naakubaire ndi endyarya kuri ntarikubagambira ekindi ekitari amazima? Nkaabaire ndi omuntu mubi buzima. Obumwe n'obumwe obundi nintekwa kushaashasa, kwonka t'ahabw'okuba ngu mba niinyenda kukora ekyo, n'ahabw'okuba . . . tari nyowe oba naashaasha. Amazima nigo gaba nigashaasha. Kandi ni-ni . . . Kwonka niinyikiriza ku niyo nshonga erikutuma mwaija, ahabw'okuba mbeera kimwe ow'amazima ahariimwe, nkora eki ndikubaasa kyona kubahwera. Mukama ahwre buri omwe omuriimwe.

4 Kandi hati niinyenda kwebaza abantu ahabw'okukwatanisa kwabo kurungi, abantu b'orurembo hanu, nabo, abatuhaire, abatwikiriize kupangisa enju egi ey'eishomero, ekishengye kihango eki, hamwe n'ekishengye kihango ky'okukoreramu emizaano. Kandi niinyenda kusiima ba ofiisa ku muraabe muri aha. Kandi nabwo niinyenda kusiima Houston Colvin, orikureeberera hanu, ahabw'okukwatanisa kwe kurungi okutuhwera kutunga omwanya ogu n'okuba naitwe buri kiro.

Nitusiima Poriisi ya Jeffersonville ahabw'okwija hanu n'okurinda, aha muhendo ogw'ahansi buzima. Nintekateeka nk'ahabwa doola ibiri buri shaaha, ezi poriisi etairwe hanu ahabw'omurimo ogw'omutaano, okuta emotoka omu myanya yaazo, okureeba ngu tihaabaho . . . tihaagira ekyabaho. Kandi buri kimwe kibaire kurungi. Nitusiima abantu ahabw'ekyo. Kandi ahari-ahari, nabwo, inginiya hanu aha-aha kakiiko akarikutegyeka, naamureeba. Na boona abakwatanisiise hamwe n'eki, buzima nitubasiima.

5 Ninsiima buri omwe omuriimwe ahabw'ebiconco. Billy yandeetera, omu ihangwe eri, e-ekiconco, ebiconco bingi, na zaabokisi, switi, n'ebindi nk'ebyo. Kandi kimwe ahari ebyo kibaire kiri-Abaine omugisha oku bari, n'ekishushani kya Kristo kikoreirwemu-mu, Okubuurira kw'aha Kibungo. Buzima kibaire kiri kirungi. Buzima Nimbasiima. N'ebintu bingi munonga, tindikumanya oku naakubasiima ahabw'ekyo. Reero, nabwo, ahabwo-ahabw'obushagiki bwanyu, okushashurira oruteerano, buzima nitukisiima, n'omutima gwaitu gwona. Mukama ahe omugisha buri omwe omuriimwe, munonga.

Billy agizire ngu, habaire hariho abantu baingi, mubaire nimushaba okwehanuuza okw'omubonano omu bwire obu. Na baingi bashabire obwo baine abaana b'okumurika. Oo, ka niinyenda ngu nkikore!

Kwonka, nimureeba, obu nyizire obwire obu, nikyetengwa munonga. Nintekwa kuguma ndigye, obwire bwona, omu kwega, Ekigambo eki n'okushaba, ahabw'okureeta Obutumwa obu. Mwareeba, tiburi . . . N'o-N'obw'omutaano ahariitwe, ahabw'okuba n'okusherura okukunda kwa Ruhanga reero n'okugamba ebyo bintu. Kandi ebyo byona biine kuba nibiikirizana, reero n'okubuuza Ruhanga eky'okureeta.

6 Hati, Mukama ku araasiime, nituza kugaruka juba omurundi ogundi, ahonaaho ku turaabaase kutunga ekiro. Ngizire o-okuteesa oku mpaireyo, nari-nari ngambire ekintu aha bikwatiraine na Paasika. Reka mbanze nkishwijume, abaw'okuba nintekateeka ngu nyine ebi ndikuza kuba ninkora omuri California nk'omu bwire obwo. N'ahabw'ekyo ekyo nikibaasa kuba kigwire. Beitu, ku turaagarukye omurundi ogundi omuri tabirinaakuru, nituza kuboherereza kaada, n'ekanisa, kandi-kandi tubahe e-ekiro n'obwire. Obwo ninza, obundi obwire obwo, omurundi ogundi . . .

Tintaireho obwire bwona bw'okushabira abarwaire. Titutungire saaviisi emwe ahu tureetsire abantu n'okubashabira. Tubaire nitubareka bagyenda. Ab'eishe-emwe baitu hanu babaire nibabuurira, Ow'eishe-emwe Lee Vayle n'ow'eishe-emwe . . . ab'eishe-emwe aba abandi babaire nibabuurira, n'okushabira abarwaire, n'okubatiza omu amaizi, nibabatiza, nimmanyisa, reero bandeka kuguma nyenka n'Ewigambo. Nitusiima abashaija aba. Bakozire omurimo gw'ekitiinisa.

7 Hariho abanywani baingi hanu abu naakubaire niinyenda kubugana. Nindeba ahansi ndeeba John na Earl. Kandi hariho na Dokita Lee Vayle, omwe ahari ba manegya b'oruteerano. Ow'eishe-emwe Roy Borders. Abantu abo, tintungire nangwa . . . Timbakwatsire nangwa n'omu ngaro zaabo. Tintungire omugisha okukikora. Nintekateeka ahari banywani bangye okuruga Kentucky, na hanu, abaheereza abanywani, ka ninkyenda kukwata omu ngaro zaabo! Ow'eishe-emwe Blair, mureebire hanu ekiro kiri. Na baingi aha bantu abo abu ndi-abu ndikukunda, babaire omu nteerano ezitari zimwe, kandi timbaasize kukwata omu ngaro zaabo. Ni-ningyezaho . . . Tikugira ngu tindikwenda kukora ekyo; n'ahabw'okuba tinyine bwire bw'okukikora, nyine obwira kwonka.

8 Okushoroora abaana, buzima. Mutabani wangye, mwijukuru wangye omuto abaire ari ow'okushoroorwa omu kuteerana oku. Tintungire obwire kukikora; Daudi omuto. Ndi ishenkuru, emirundi ebiri hati. N'ahabw'ekyo, Omw. May, ku araabe ari hanu ekiro eki, owampaire enkoni egyo, nikireebeka ninza kugikozesa obwire butari bwa hare.

N'ahabw'ekyo, nkagambira Billy, naagira nti, "Baiburi ekagira ngu mukanye mwijure ensi, kwonka omutwaro gwona tiwe gwahairwe." Kandi abajukuru aba bakwaitse nibakuratana jubajuba.

N'ahabw'ekyo, mwijukye, mukaamwana wangye akaba ari engumba, okubanza. Akaba atarikubaasa kuzaara. Kandi eizooba rimwe, obwo ninduga omu ruteerano, Mukama akagamba naanye yaagira ati, "Loyce, nooza kuzaara omwana. Mukama yaakuha omugisha. Endwara y'abakazi yaawe yaakira." Paulo omuto akazaarwa, ameezi mwenda agaakuratiireho.

9 Ameezi abiri omwana ogu atakazairwe, nkaba nshutami, nindya kyantsya akasheeshe kamwe, aha meeza, kandi Loyce na Billy bakaba bashutami aha rubaju orundi ha meeza kuruga ahariinye. Naareeba Loyce naagaburira akeereere kato kaine eya pinki . . . nari kashwekirwe esuuka ya bululu. Na Billy akaba ashutami omu nshonda, naagaburira Paulo omuto. Naagira nti, "Billy, naareeba hati okworekwa. Loyce yaaba naagaburira omwerekere ashwekirwe burangiti ya bululu."

Yaagira ati, "Orugyendo rwangye kuza kuhiga tirukibaho. Ago n'ameezi mwenda okuruga hati."

Ameezi ikumi na kumwe agaakuratiireho, Daudi omuto yaazaarwa. Tinkabaasize nabwo okumushoroora ahari Mukama, kandi tindikuza kubaasa okuhitsya obu turaagarukye omurundi ogundi. N'ahabw'ekyo nimureeba eki kiri.

10 Ka ninkunda abantu n'okuteerana hamwe kwabo! Kwonka ab'eishe-emwe baitu babaire nibashabira abarwaire, kandi nimmanya ngu bubaire obusinguzi. Buri kiro tushabiire abarwaire, omwe naata emikono ye aha ndiijo, twena hamwe, reero omuringo ogwo nikihika hoona. Kwonka obundi, Ruhanga ku araakisiime . . . Ninja okukihandiika aha kaada, ku turaagyohereze. Ku ndaagarukye, ninza kushoroora nk'ebiro bibiri nari bishatu, omurundi ogundi, kushabira abarwaire kwonka n'okukora eki turikubaasa omu muringo ogwo. Hati, kandi ninsiima abantu abaw'obuhwezi bwabo, omurundi ogundi.

11 Hati niinyenda kushoboorora, akaanya kakye, aha-aha Butumwa bw'akasheeshe aka. Tihariho kubangaanisa, timbumariire kimwe, kwonka nintekateeka ngu nimwetegyerez. Kandi nimpamya timubaasize . . . Timurimanya na kakye eki ekyo kibaire ahariinye kukora.

Hati, nikireebeka kyorobi munonga ahariimwe. Kwonka, imwe, nimureeba eki murikukora? Nimutwara omwanya gwa Ruhanga, okuranga Ekintu nanka. Kandi ntakakozire ekintu ekyo, kikaba nikyetaagisa okugarukwamu kuruga ahari Ruhanga. Kandi Akaba naateekwa kushuuma, n'okweyoreka butunu We wenka, n'okuha okushuuuruurirwa. N'ahabw'ekyo, mwareeba, eki n'eky'Ekanisa. Kandi mwijukye, nkagira ngu, "Ebi, eki nikyo naagambire ngu, kikaba kiri eky'Ekanisa yonka."

Kandi kugira ngu mutungye obwesigye kandi mumanye, ngu ogwo abaire ari Ruhanga ogwo omwe owangambiire eruguru okwo ahu kaamugye zaabaire zitari. Ati "Gamba, kandi ogambe ahu ziraabe." Kandi kyabaho emirundi eshatu ekurataine. Hati, ku Araabe naabaasa abaw'ekigambo ekyo nikyo kimwe kuhanga ekintu ekitariho, reeba oku Eki kirihamira kimwe aha Kiro eky'okucweraho Orubanja! Mwareeba? Abantu bakaba bariyo kureeba ebintu ebi, n'okumanya. N'oku Paulo yaagambire, omu biro ebyahingwire. Hariho abantu abaabaire bari nawe, aba-abahuriire ensi neetengyeta; kwonka batahurire eiraka, kwonka ba-bakareeba E-

Enyomyo y'Omuriro.

12 Kikankora kurungi, nabwo, ku kyahweire; kureeba abashaija n'abakazi baabo, abu ndikumanya ngu n'Abakristaa yo b'amazima, buri omwe naagwa munda ondiijo nibarira.

Kandi muhurikize, banywani, Ruhanga ahamya Ekigambo Kye n'obumanyiso n'ebirikuhamya, kuhamya ku Kiri amazima, Ekigambo ekyagambirwe. Hati mwijukye, Omushana ogwo ogwabaire guri omu Kicu ekyo, ogwahaire okushuuuruurirwa. Nkaba . . .

Muhara wangye omuto abaire nangambira, Saara hanu, ngu ku babaire . . . Eishomero eryo okwo omuri Arizona babaire nibareeba ahaiguru okwo omu kaabunga akatarimu bicu, nibareeba Ekicu eki ekitarikwetegyerezibwa aha rushozi orwo, nikiinamuka kandi nikishuma, n'Omuriro ogurikushushana nk'omuringa ogurikwengyengyeta ogweziibwe nigwaka Omurikyo. Omwegyesa akasiibuura abeegi n'eishomero, yaabareeta omu maisho, yaagira ati, "Muraareebireho ekintu kyona nka kiriya? Mureebe oku kirikushusha kuriya."

Mwijukye, nigwo ogwo Mushana gumwe ogurikushushana nk'omuringa ogurikwengyengyeta ogweziibwe oguri aha rukiri. N'ahabw'ekyo ni Ruhanga ogwo omwe, okushuuuruurirwa kumwe, owaagizire ati, "Bagambire bakore eki." Ekyo nikyo mbagambiire akasheeshe aka, n'ahabw'ekyo Nkikyo aho.

13 Ku kyakuba kiri ngu munywani wangye omurungi, Ow'eishe-emwe Roy Roberson, ahurikiize omuri Tucson. Roy, noijuka, ekiro kiri, okworekwa oku waareebire obu twabaire twemereire aha rushozi? Okaija ahariinye, kandi Ekicu ekyo kikaba kiri ahaiguru? Okashuma nootambura, noomanya eki Yaakugambiire; kandi naanye nkakugambira omu nju egyo, ekiro kiri? Nikyo ekyo, Roy. Otagaruka kwemereza omutima, mutabani. Kihwaire.

Timurikumanya eki ekyo kirikumanyisa! N'embabazi. Naabakunda. Kandi Mumukunde, Mumuheereze n'okwebundaaza kandi Mumuramye ebiro byanyu byona. Mushemererwe, mugyende omu maisho kandi mutuure nk'oku muri. Ku muraabe mushemereirwe, mugumizemu mutyo. Mutarikora ekintu kibi omurundi ogundi, ekirikushushana nakyo. Mugumizemu. N'embabazi za Ruhanga.

14 Hati niinyenda kushaba omurundi ogundi tutakataahire omu Kigambo. Nibangahi abarikwija kunshabira? Ninduga omu ruteerano nz'omurundi. Nimuza kunshabira?

Nimumanya. Niinyenda kubeeshongorera akeeshongoro kakye, twena hamwe, tutakagiire omu Kigambo. Nikwo . . . nikwo tumanye Ruhanga . . . Ak'okushoroora kakye kwonka. Murahuriireho akeeshongoro kakye aka, Naakutaho Omutima? "Omu mushana n'omu maganya, Naakutaho omutima."

Omukazi mukye naija aha nanga. Bantu 'mwe, niinyenda kwebaza omukazi mukye ogu nabwo. Mbaire ntarikumumanya. N'omwe omu baishiki b'omudiikoni hanu. Hatariho kubanganiisa . . . n'omuhara mukye ow'Ow'eishe-emwe Wheeler. Hati akuzire. Akaba ari akantu kakye akaabaire kashutama aha kuju kwangye, juba hanu, baitu hati n'empangare. N'ahabw'ekyo buzima niimusiima ahabw'okukozesa etalanta ye omu kweshongora, kandi hati naateera enanga kurungi munonga. Noobaasa kutuha eiraka, ow'eishe-emwe kazi? Twena hamwe hati.

Naakutaho omutima,

Naakutaho omutima;

Omu mushana nari omu kicuucu,

Naakutaho omutima.

Ekyo nimukikunda? Reka tukyeshongore omurundi ogundi, twena hamwe.

Naakutaho omutima,

Naakutaho omutima;

Omu mushana nari omu kicuucu,

Naakutaho omutima.

Ow'eishe-emwe Dauch, naakukorera, naiwe, ow'eishe-emwe. Timurikumukunda [Abateeraine baagira bat, "Amiina." -Omur.]

Reka twinikye emitwe yaitu hati.

15 Ruhanga Omukundwa Omunyambabazi, n'ebihandiikirwe ebi bikye hanu by'ebintu bikye by'okugambira abantu, n'okugaruka omurundi ogundi kujuriza aha by'akasheeshe aka ogundi murundi, ahabw'okuba nikyo abantu baija kuhurira. Ninshaba, Ruhanga, ngu Nooza kwikiriza abantu kureeba ngu Ruhanga abakunda kandi abataho omutima. Kandi tiinye ohaire Ekyo, Mukama, kyahamiibwe ku kiri Amazima. N'ahabw'ekyo ninshaba, Ruhanga Omukundwa, ngu rukundo Yaawe egume omu bantu aba obutoosha. Ekiro eki, nituza kutaana ahanyima y'okuteerana oku n'okutaaha omu maka gaitu agatari gamwe, ni-nikiba nk'ekyatushaasha, bamwe, munonga,

Mukama. Ninshaba ngu Oheereze abantu aba omugisha.

Hati turikwiririra Ekigambo, omu kushaba, n'okwiririra Ekigambo ekihandiikirwe, nitushaba ngu Nooza kutwara Ekigambo eki ekihandiikirwe kandi Okihindure ekihuriire ahariitwe ekiro eki. Reero ku turaarugye omu kyombeko eki ekiro eki nitutaana kuza mu maka gaitu agatari gamwe, reka tugambe nk'abo abaabaire nibaza Emau, abaatambwire Nawe eizooba ryona baitu nabwo Batamumanye; kwonka ku Yaabataahize omu kishengye ekiro ekyo, obwo enyigi zonna zikingire, Akakora ekintu ekirikushushana nk'eki Yaakozire Atakabambirwe. Ahabw'ekyo eki yaakozire, bakamanya ku Azookire.

Kikore omurundi ogundi ekiro eki, Mukama. Kituhe, obwo enyigi zikingire, kandi akabiina Kaawe kakye kashutami hanu, kategyereize. Kandi, Taata, ku turaataahe omu maka gaitu, nituza kugamba nk'oku baagambire ngu, "Emitima yaitu tiyaashashaanuka obu Yaaba naagamba naitwe omu muhanda!" Nitwehayo, na boona, mu mikono Yaawe, Mukama. Tutwaze nk'oku Orikuimma. Omu Iziina rya Yesu. Amiina.

16 Hati reka tutaahe omu saaviisi honyini hati, juba juba. Murikubiikuura naanye, ku muraabe nimukunda, omu Kitabo ky'Abaheburaayo, n'okushuuruirwa okundi aha Butumwa. Nituza kukugamba okumara obwire bukye ekiro eki, Mukama ku araasiime. Kandi obwo twaba nitushoma emishororongo y'okubanza eshatu ey'Abaheburaayo 7:1 okuhitsya ahari 3, reero n'okugamba ahari eki. Kandi titurikumanya eki Mukama araakore; titurikumanya. Ekintu kimwe eki tushemereire kukora n'okwikiriza kwonka, okureeba, okushaba. Ekyo kihikire? Kandi n'okwikiriza ngu "Naaza kutuma byona byakwatanisiza hamwe kureeta ebirungi ahari abo Abarikumukunda," ahabw'okuba Akaraganisa kukikora.

Ahakuba Melekizedeki ogwo, omugabe wa Salemu, omunyamurwa wa Ruhanga Rukira-boona, akabugana Abrahamu, naatabaaruwa omu rugamba kwita abagabe, yaamuha omugisha;

Kandi niwe Abrahamu yaahaire kimwe kya ikumi ekyo byona. Melekizedeki ogwo okubanza n'omugabe w'okuhikiirira, nk'eziina rye oku ririkushoboororwa, ekyo kabiri n'omugabe wa Salemu, ekirikushoboororwa ngu omugabe w'obusingye.

Ka tweyongyere kakye okushoma.

Taine ishe, taine nyina, n'obu baakuba baishenkuru; . . . taine butandikiro bw'amagara ge, kandi taine bugarukiro, kureka naashushanisibwa nk'Omwana wa Ruhanga, atuura ari omunyamurwa ebiro byona.

17 Teekateeka aha Muntu mukuru ogu, Omuntu ogu ka ni mukuru! Kandi hati, ekibuzzo ni ngu, "Omuntu ogu n'oha?" Abatendekirwe omu by'ediini baataaha baine ebiteekateeko ebitarikushushana. Kwonka okuruga obu Obumanyiso Mushanju bwabambuurwa, Ekitabo ky'enaama ekitaaha kiri enaama ahariitwe . . . Okurugiirira omu kitabo ky'Okushuuruirwa 10:1 okuhitsya ahari 7, enaama zonna ezihandiikirwe omu Kitabo eki, ezitaaha zisherekirwe omu busingye bw'abahunduuzi, zishemereire kureetwa omu rwatu na maraika w'ekanisa y'obusingye obw'aha muheru. Nibangahi abarikumanya ku ekyo kihikire? [Abateeraine baagira bat, "Amiina." -Omur.] Ekyo kihikire, zishemereire kureetwa. Enaama zonna ez'Ekitabo ky'enaama niziza kushuuruirwa entumwa ya Laodikea y'obusingye obwo.

Obu hariho okuhakana kwingi aha Muntu ogu kandi n'eishomo eri, ninteekateeka ngu kitushemereire okukicondoza, okumanya Ou ari. Hati, hariho nyegyesa nyiningi Ahariwe.

Emwe ahari ezo nyegyesa, neegira ngu, "Akaba ari ekitebyo ekigunzirwe kwonka. Akaba atari omuntu buzima."

Kandi ezindi zigira ngu, obwo, "Bukaba buri obunyamurwa. Obwo bukaba buri obunyamurwa bwa Melekizedeki." Egyo niyo erikureebeka nk'ehikire, einemu amazima okukira ey'okubanza, ahabw'okuba nibagamba ngu bukaba buri obunyamurwa.

Terikubaasa kuba egoo, ahabw'okuba omu mushororongo gwa 4 nihagira ngu Akaba ari Omuntu, "Omushaija." N'ahabw'ekyo, okugira ngu abe Omuntu, ashemereire kugira ebikozire omuntu, "Omuntu." Gutari omuringo gw'obunyamurwa; kureka Omuntu! N'ahabw'ekyo Akaba atari omuringo gw'obunyamurwa kwonka, kandi Atari ekitebyo ekigunzirwe. Akaba ari Omuntu.

18 Kandi Omuntu ogu n'Otahwaho. Ku oraayetegyereze, "Taine ishe. Taine nyina. Taine butandikiro bw'obwire. Taine bugarukiro bw'obwire." Kandi Ou yaabaire ari weena na hati akiri ohuriire ekiro eki, ahabw'okuba Baiburi ekagira hanu, ngu, "Taine n'obu yaakuba ishe, nari nyina, taine butandikiro bw'amagara, nari obugarukiro bw'amagara. N'ahabw'ekyo naateekwa kuba ari Omuntu Otahwaho. Ekyo kihikire? [Abateeraine baagira bat, "Amiina" -Omur.] Omuntu Otahwaho! N'ahabw'ekyo naateekwa kuba ari Omuntu omwe wenka, ogwo ni Ruhanga, 'habw'okuba Niwe wenka Omwe Otahwaho. Ruhanga!

Hati, omuri Timoseo ey'Okubaanza 6:15 na 16, ku muraabe nimwenda kukishoma obwire obundi, niinyenda ngu mukishome.

Hati, ekintu eki ndikuhamya, ngu, Akaba ari Ruhanga, n'ahabw'okuba Niwe Muntu wenka otafa. Kandi hati, Ruhanga Naayehindura We wenka Omuntu; ekyo nikyo Yaabaire ari, "Taine ishe, taine nyina, taine butandikiro

bw'amagara, taine bugarukiro bw'ebiro."

19 Hati nitushanga omu Byahandiikirwe ngu abantu baingi beegyesa ngu, "harimu abaperesona bashatu omu Bwaruhanga." N'ahabw'ekyo, torikubaasa kugira ebikozire omuntu haza otari omuntu. Nooteekwa kuba omuntu kugira ebikozire omuntu.

Omuheereza w'Omubaputisiti, saabiiti nkye eziwingwire, akaija, owangye omuka, yaagira ati, "Niinyenda nkugorore aha Bwaruhanga obwire bumwe ku oraabone obwire." Akanteerera esimu, nimmanyisa.

Naagira nti, "Nyine obwire hati hati, 'hakuba niinyenda ngororokye, kandi ebindi byona tubite aha rubaju, tukore eki."

Kandi akaija, yaagira ati, "Ow'eishe-emwe Branham, oyegyesa ngu hariho Ruhanga omwe wenka."

Naagira nti, "Eego, sebo."

Yaagira ati, "Mbwenu," yaagira ati, "niinyikiriza hariho Ruhanga omwe, kwonka Ruhanga omwe omu Baperesona bashatu."

Naagira nti, "Sebo, ekyo kigarukyemu omurundi ogundi,"

Yaagira ati, "Ruhanga omwe, omu Baperesona bashatu."

Naagira nti, "Okashomera nkahi?" Mwareeba? Kandi yangambira e-eitendekyero rya Baiburi. Naagira nti, "Nimbaasa kukiikiriza. Torikubaasa kuba omuntu haza otaine ebikozire omuntu. Kandi ku oraabe ori omuntu, ori omuntu omwe iwe wenka. Ori omuntu okwawe, oyetongoire."

Kandi yaagira ati, "Mpaho, abatendekirwe omu by'ediini tibarikubaasa nangwa n'okushoboorora ekyo."

Naagira nti, "N'ahabw'okushuuruirirwa."

Kandi yaagira ati, "Tindikubaasa kwakiira okushuuruirirwa."

Naagira nti, "Obwo tihariho omuhanda ogu Ruhanga arikuhikaho, ahabw'okuba, 'Bisherekirwe amaisho g'abanyabwengye n'abarikwetegyereza, byashuuruirirwa abaana bato,' byashuuruirirwa, okushuuruirirwa, 'byashuuruirirwa abaana bato abo abarikubyakiira, abarikwega.'" Naagira nti, "Tihariho omuhanda gwona ogu Ruhanga arikuhikaho; Omweewireho."

Baiburi yoona n'okushuuruirwa kwa Ruhanga. Ekanisa yoona eyombekirwe aha kushuuruirwa kwa Ruhanga. Tihariho omuhanda ogundi ogw'okumanyiram Ruhanga, kureka ahabw'okushuuruirwa kwonka. "N'omuntu weena ou Omwana aikiriza Kumushuuruirira." Okushuuruirirwa; buri kintu n'okushuuruirirwa. N'ahabw'ekyo, oku... Okwanga okushuuruirirwa, obwo nooba ori otendekirwe omu by'ediini orikufuka, kandi nooba otaine matsiko.

20 Hati, hati, nitureeba ngu Omuntu ogu "taine ishe, taine nyina, taine obutandikiro bw'amagara ge nari obugarukiro bw'amagara." Akaba ari Ruhanga, en morphe.

Hati, ensi, ekigambo ekyo nikiruga, omu kigambo ky'Orugriika, ekirikumanyisa "okuhinduka" kikakozesibwa. Okwehindura We wenka, en morphe, omuntu omwe kwehindura... Omuntu omwe; ekigambo ky'Orugriika aho, en morphe, nikimanyisa... Kikaruga aha muzaano gwa katemba, oku omuntu omwe arikuhindura ekyetwekyerero kye, kugira ngu ahindukye omuntu ondijo.

Nk'omu-omu ishomero, ijweriho aha, niinyikiriza, Rebeka, atakaherize emishomo ye, bakagiraho gumwe aha mizaano ya Shakespeare. Kandi omutsigazi omwe muto akahindura ebijwaro bye emirundi mingi, ahabw'okuba akazaana ebicweka bibiri nari bishatu ebitarikushushana; kwonka, ari omuntu omwe. Akarugayo, omurundi gumwe, ari ekyatsire; kandi ku yaarugireyo omurundi ogwakuratsireho, akaba ari omuntu ondijo. Kandi hati ekigambo ky'Orugriika, en morphe, nikimanyisa ngu "akahindura ekyetwekyerero kye."

21 Kandi ekyo nikyo Ruhanga yaakozire. Ni Ruhanga ogwo omwe obwire bwona. Ruhanga omu nshusha y'Ishebona, O-Omwoyo, Enyomyo y'Omuro. Ruhanga ogwo omwe yaaba omuntu yaatuura naitwe, en morphe, yaarugayo kugira ngu Abaase kureebwa. Kandi hati ogwo omwe Ruhanga niwe Mwoyo Orikwera. Ishebona, Omwana, Orikwera... ti Baaruhanga bashatu; ofiisi ishatu, ebikorwa bishatu bya Ruhanga omwe.

Baiburi ekagira ngu, "Hariho Ruhanga omwe," ti bashatu. Kwonka okwo nikwo batarabaasize... Torikubaasa kugorora eki reeru okatunga Baaruhanga bashatu. Ekyo toribaasa kukiikiririsa Omuyudaaya na kakye. Ekyo ninkikugambira. Ogwo orikukyetegyereza gye, naamanya ku hariho Ruhanga omwe wenka.

22 Yetegyereze, nk'ekishushani ekisharwirwe, ashereka, akishweka n'e-n'ekishwekeyeso. Ekyo nikyo Ruhanga akozire aha busingye obu. Bitaaha bisherekirwe. Ebintu ebi byona bitaaha bisherekirwe, kandi bishemereire kushuuruirwa omu busingye obu. Hati, Baiburi neegira ngu nibiza kushuuruirwa omu bwire bw'aha muheru. Ni nk'omusharuzi w'ebishushani naashereka eki-eki akozire okuhitsya obwire obu arikwihaho ekishwekeyeso reero

kikareebeka.

Kandi okwo nikwo Baiburi etwire eri. Etuura eri omurimo gwa Ruhanga ogutwire gushwekirwe. Kandi etwire esherekirwe okuruga aha kuhangwa kw'ensi, kandi n'Enaama Yaayo eyekubiremu emirundi mushanju. Kandi Ruhanga akaraganisa omu biro ebi, omu busingye bw'ekanisa egi eya Laodikea, ngu Naija kwhaho ekishwekyeso ahari byona reero tubaase Kukireeba. Ka n'ekintu ky'ekitiinisa!

Ruhanga, en morphé, ashwekirwe omu Nyomyo y'Omuriro. Ruhanga, en morphé, omu Muntu orikwetwa Yesu. Ruhanga, en morphé, omu Kanisa Ye. Ruhanga ahaiguru yaitu, Ruhanga arinaitwe, Ruhanga omuriitwe; okweganura ahansi kwa Ruhanga.

Okwo haiguru, n'orikwera, tihaine owaabaire naabaasa Kumukwataho. Akashuma aha rushozi; nangwa n'enyaamaishwa ku yaakuhikire aha rushozi, ekaba neeteekwa kufa.

Reero bwanyima Ruhanga akashuma yaahindura eihema Rye, reero yaashuma yaatuura naitwe, yaaba omwe naitwe. "Kandi Twamukwataho," Baiburi ekagamba. Timoseo ey'okubanza 3:16, "Kandi tihariho kubanganisa, enaama y'Obwaruhanga ni nkuru buzima; Ahakuba Ruhanga akoorekwa omu mubiri, yaakwatwaho n'engaro." Ruhanga akarya eby'okurya. Ruhanga yaanywa amaizi. Ruhanga yaabyama. Ruhanga yaarira. Yaaba omwe naitwe. Ni kirungi, nikishushanisibwa omuri Baiburi!

Ogwo akaba ari Ruhanga ahaiguru yaitu; Ruhanga arinaitwe; hati ni Ruhanga omuriitwe, Omwoyo Orikwera. Tari Omuperesona wa kashatu; Omuntu niwe omwe!

23 Ruhanga akashuma yaaba omuntu, kandi yaafa orufu, omuri Kristo; nikwo Abaase kushemeza Ekanisa, ngu abone kugitaahamu, ahabw'okukwatanisa. Ruhanga akunda okukwatanisa. Ekyo nikyo yaahangiire omuntu omurundi gw'okubanza, n'ahabw'okukwatanisa; Ruhanga atuura wenka, hamwe na Baakerubi.

Kandi yetegyereze hati, Akahanga omuntu, kandi omuntu yaagwa. N'ahabw'ekyo Akashuma kandi yaacungura omuntu, ahabw'okuba Ruhanga akunda okoramibwa. Ekigambo ruhanga kyo kyonyini nikimanyisa "ekintu ekirikuramibwa."

Kandi eki ekiija omuriitwe, nk'Enyomyo y'Omuriro, nk'ekintu ekirikuhindura emitima yaitu, niwe Ruhanga omwe owaagizire ati, "Habeho omushana," kandi omushana gwabaho. Tahinduka oku abaire ari nyomwabazyo, n'eriizooba nikwo ari, kandi nikwo ariguma ebiro byona.

24 Hati, omu kutandika Ruhanga akaba atuura wenka, n'Ebimurimu Bye, nk'oku ngambire akasheeshe aka. Ebyo n'ebiteekateeko Bye. Hakaba hatariho kintu kyona, kwhaho Ruhanga wenka, kwonka Akaba aine ebiteekateeko.

Nk'oku omwombeki mukuru arikubaasa kushutama, akateera puraani omu biteekateeko bye, eki arikuteekateeka ngu naaza kwo-okwombeka. Okuhanga, hati, tarikubaasa kuhanga. Naabaasa kkwata ekintu ekyahangirwe kandi akikore omu nshusha endijio; 'habw'okuba Ruhanga niwe muhanda gwonka . . . niwe Wenka orikubaasa kuhanga. Kwonka ata omu biteekateeko bye eki arikuza kukora, kandi ebyo n'ebi arikuteekateeka, ebyo n'ebi arikwetenga. Hati n'ekiteekateeko, reero bwanyima akigamba, kandi obwo kiba ekigambo. Kandi e-ekigambo ni . . .

Ekiteekateeko, ku kigambwa, kiba ekigambo. Ekiteekateeko ekyagambwa kiba ekigambo, kwonka kibanza kuba ekiteekateeko. N'ahabw'ekyo, n'ebiri omuri Ruhanga; reero biba ekiteekateeko, bwanyima biba ekigambo.

25 Yetegyereze. Abo abaine, Amagara Agatahwaho, ekiro eki, bakaba bari hamwe Nawe kandi bari Omuriwe, omu kuteekateeka Kwe, hatakabaireho na Maraika, enyonyoozi, Kerubi, nari ekindi kyona. Obwo n'Obutahwaho. Kandi ku oraabe oine Amagara Agatahwaho, okaba otuuraho obutwire bwona. Kutari okubaho kwawe hanu, kureka ekyemerero n'enshusha ei Ruhanga otaine bugarukiro . . .

Kandi ku araabe Aine obugarukiro, biri Tari Ruhanga. Ruhanga naateekwa kuba ataine bugarukiro. Itwe tugira obugarukiro; We tagira bugarukiro. Akaba ari hoona hoona omu bwire bumwe, naamanya byona, kandi aine obushoboorozi bwona. Ku Araabe atarikwo ari, obwo Tabaasa kuba Ruhanga. Naamanya ebintu byona, emyanya yoona, ahabw'okuba hoona hoona omu bwire bumwe. Okumanya byona Kumuhindura okuba ori hoona hoona omu bwire bumwe. We n'Oriho; Tari nk'omuyaga. We n'Oriho; Atuura omu nju. Kwonka ahabw'okuba orikumanya byona, naamanya ebintu byona, Kimuhindura ori hoona hoona omu bwire, ahabw'okuba Amanya byona ebirkubaho.

Tihaine omura ogurikubaasa kuhumbya eriisho Atakimanyire. Kandi Akakimanya ensi etakabaireho, emirundi ei gurihumbya amaisho, kandi n'ebishaju ebi gwine oku birikwingana, n'ensi etakabaireho. Ekyo n'okutagira obugarukiro. Titurikubaasa kukyetegyereza omu biteekateeko byaitu, kwonka ogwo niwe Ruhanga. Ruhanga, otagira bugarukiro!

26 Kandi ijuka, iwe, amaisho gaawe, ekyemerero kyawe, kyona eki waabaire ori, okaba ori omu biteekateeko Bye omu kutandika. Kandi ekintu kyonka eki ori n'ekirkworeka, ekigambo. Ku Yaaherize kukiteekateeka, Yaakigamba, kandi reeba oriho. Ku kiraabe kitari kityo, ku oraabe waabaire otari omu biteekateeko Bye, tihariho omuringo gwona ogu orikwija kubayo na kakye, ahakuba Niwe oha Amagara Agatahwaho.

Nimwijuwa oku twashomire Ebyahandiikirwe? "Tikirikwegamira kweyendera kw'omuntu, nari obweziriki bwe, kureka Ruhanga!" Kandi kugira ngu okumanya ebintu ira bitakabaireho Kwe kubaase kugumaho buzima, Akaba naabaasa kutoorana, obwire bwona butakabaireho, omuntu weena. Ruhanga naayemariirira omu kutoorana Kwe. Ekyo mubaire nimukimanya? Ruhanga naayemariirira.

N'oha owaabaire ariyo enyima okwo Kumugambira oburyo oburukukiraho kuba burungi bw'okukoramu ensi? N'oha owaabaire naabaasa kwehanga Kumugambira ngu Akaba naakora emirimo Ye kubi?

Nangwa n'ekyo-n'ekyo Kigambo kyonyini, Kyo kyonka, nikyemariirira buzima. Nangwa n'okushuuruirwa nikwemariirira. "We naashuuruirira ou Ayenda kushuuruirira." Okushuuruirwa kwo kwonyini, kwo kwonka, nikwemariirira omuri Ruhanga. Okwo nikwo abantu barikuhonda aha bintu, bakagurukira ebintu, bakateera ebintu, batarikumanya eki barikukora. Ruhanga naayemariirira omu mirimo Ye.

27 Hati Nitumureeba omu kutandika, ebimurimu Bye. Kandi, hati, okaba ori Nawe obwo. Obwo nibwo Ekitabo ky'Amagara kyareebeka.

Hati, nitushoma hanu omu Kushuuruirwa eshuura ya 13, omushororongo gwa 8, ngu, "Egyo nyamaishwa erikwija aha nsi," omu biro ebi eby'aha mperu, "neeza kubeihabeihabantu abantu abo boona abatuura omu nsi abu amaziina gaabo gatarahandiikirwe omu Kitabo ky'Amagara ky'Omwana gw'Entaama ensi etakahangirwe."

Kiteekateekyeho! Yesu atakabaire kuzaarwa, emyaka enkumi ina atakaizire omu nsi, n'emyaka enkumi n'enkumi otakaizire omu nsi; Yesu, omu kiteekateeko kya Ruhanga, akafa ahabw'ebibi by'ensi, kandi Ekitabo ky'Amagara kikahandiikwa, n'eiziina ryawe ryateebwa omu kitabo ekyo ky'Amagara ensi etakahangirwe. Ago n'Amazima ga Baiburi. Nooreeba, eiziina ryawe rikateebwaho Ruhanga kandi ryahandiikwa omu Kitabo ky'Amagara ensi etakahangirwe.

Okaba oriyo omu byabaire Bimurimu. Torikukijuka, ngaaha, ahabw'okuba ori ekicweka ky'Amagara Ge kyonka. Ori ekicweka kya Ruhanga waaba mutabani nari muhara wa Ruhanga.

Nk'oku ori ekicweka kya sho ow'omu nsi! Ekyo kihikire. Nikwo ori. Ekishaija nikyo kirikuba kiine obusigo, eshagama. Kandi obwo ku butaaha omu-omu ihuri, obwo oba ekicweka kya sho; na nyoko n'ekicweka kya sho, nawe; n'ahabw'ekyo mwena muri ekicweka kya sho.

Ekitiinisa! Ekyo nkinaga aheeru ebigombe by'amadiini, kutwarira hamwe. Ahaa. Buzima nikibishohoza! Ruhanga, omuri byona, omwanya gwonka!

28 Yetegyereze hati ekimurimu Kye. Obwo ekimurimu kikaba kiri, okubanza, Ruhanga; ekiteekateeko, ekimurimu kyonyini, byona omuri Omwe, bitakagambirwe. Reero ku Yaagambire, ekyo kabiri, obwo Yaahinduka Ekigambo. "Kigambo ogwo yaaba omuntu yaatuura naitwe."

Yohaana Orirkwera eshuura 1 omushororongo 1, yetegyereze, eki ni, "Bwa mbere na mbere." Kwonka, hatacabaireho, Obutahwaho! Yetegyereze, "Bwa mbere na mbere hakaba hariho Kigambo." Obu obwire bwatandika, kikaba kiri Ekigambo. Kwonka kitakabaire Ekigambo, kikaba kiri ekimurimu, ekiteekateeko. Reero kyagambwa, "Bwa mbere na mbere hakaba hariho," ekyagambirwe, "Ekigambo."

Hati twahika ahu Melekizedeki ari. Ogwo niwe Muntu ogu otarikwetegyerezibwa. "Bwa mbere na mbere hakaba hariho Kigambo, kandi Kigambo akaba atuura na Ruhanga, kandi Kigambo akaba ari Ruhanga." "Kandi Kigambo ogwo yaaba omuntu kandi yaatuura naitwe." Ekyo kikwatire aho hati, yetegyereze.

Oku-oku yaabaire ari okubanza akaba ari Omwoyo, Ruhanga, orengire eby'obuhangwa, ni kirungi, Otahwaho omukuru. Ekyo kabiri, Akatandika kwekora We wenka omuntu, omu mubiri gw'obwaruhanga, ogurikwetwa "Kigambo; omubiri." N'ahabw'ekyo egi niyo mbeera ei Yaabaire arimu obu yaabugana Abrahamu, akaba naayetwa Melekizedeki. Akaba ari omu nshusha y'omubiri gw'obwaruhanga. Hati ekyo nituza kukihikaho kandi tukihamye omu dakiika nkye, Mukama ku araasiime. Akaba ari Kigambo.

29 Omubiri gw'obwaruhanga n'ekintu eki otarikubaasa kureeba. Nigubaasa kuba guri hanu honyini hati, kwonka otarikubaasa kugureeba.

Kiri nka, mpaho, ni nka Televijioni. Egyo eri omu kyanga ekindi. Televijioni; abantu hati nibagyendagyenda omu kishengye eki honyini hati, nibeeshongora; harimu amarangi, nago. Kwonka eriisho ryo rittegyekwa kwonka n'ebihurikizo bitaano . . . Obuhangwa bwawe bwona nibutegyekwa n'ebihurikizo bitaano, nimmanyisa. Kandi nootegyekwa kwonka n'ebi amaisho garikugarukiraho kureeba. Kwonka hariho ekyanga ekindi ekirikubaasa kureebwa haabaho okuhurizana, na Televijioni.

Hati, Televijioni tekora kishushani. Televijioni ekihabura omu muhanda gwakyo kwonka, reero endeeberwamu ya Televijioni ekyakiira. Kwonka ekishushani kiba kiriho, okubanza kwa byona. Televijioni ekaba eri hanu obu Adamu yaabaire ari hanu. Televijioni ekaba eri hanu obu Eliya yaashutama aha rushozi Karumeeri. Televijioni ekaba eri hanu obu Yesu owa Nazareesi yaagyendagyenda aha nkungu za Galilaaya. Kwonka mugijumbwire hati. Bakaba batarikubaasa kukiikiriza enyima okwo. Okaabaire ori omugwa-iraro ku waakugambire ekintu ekirikushusha n'ekyo. Kwonka hati n'ekintu ekiriho.

Kandi nikwo kiri, ngu Kristo ari hanu, Baamaraika ba Ruhanga bari hanu. Kandi ekiro kimwe, omu Kutegyeka kwa Kristo kukuru kw'emyaka rukumi okurikwija, kiryaba ekirikureebekyera kimwe okukira Televijioni nari ekindi kyona, ahabw'okuba bari hanu.

Ayeshuuruura We wenka omu nshusha Ye nkuru ahabw'ebi Yaagambire, obwo Naaye-en morph We wenka omu baheereza Be kandi Ayehamya We wenka.

Hati, ngugu Ari hanu omu nshusha ey'Omwoyo. Reero bwanyima Aija omu nshusha ya . . . en morph. Hati, akareebekyera Abrahamu, en morph. Abrahamu ku yaabaire naatabaaru ka naaruga kwita abagabe, ngugwo Melekizedeki yaija, yaagamba Nawe.

30 Ekiro kiri omu ihurile rya Tucson, nkaba ninshoma ekihandiikirwemu ahu o-omukazi yaabaire naavuga omu ruguuto, niinyikiriza nka sipiidi ya mailo makumi ana, makumi ataano buri shaaha, kandi yaatomera omugurusi ojwaire ekooti. Akateera enduuru kandi yaayemereza motoka ye. Ekamurekyera ahaiguru omu mwanya. Omu ihamba honyini! Kandi yaagarukira kimwe enyima nairuka kumusherura, kandi akaba atariho. Reero akakora ki? Abantu abandi abaabaire bari enyima bakakireeba nikibaho, bareeba omugurusi ogwo yaarekyerwa ahaiguru omu mwanya, n'ekooti ye neeyehuuba. N'ahabw'ekyo bakairuka nibagaruka enyima kusherura. Tibarabaasize kubona ogwo mugurusi ahantu hoona. Bakeeta eihe rya poriisi. Poriisi ekaja kucondooza omwanya ogwo; hakaba hatariho omuntu weena aho.

Mpaho, buri omwe omuribo akahamya ati, "Emotoka ehindwire engambo, yaatomera omushaija. Yaanagwa omu mwanya, na buri omwe akireebire." Baakareebi, baijwire emotoka ibiri nari ishatu, bakakireeba nikibaho. Kiizire kumanywa ngu, emyaka etaano ey'enyima, hakaba hariho omugurusi owaabaire ajwaire ekooti owaatomeirwe akaitirwa omu mwanya nigwo gumwe.

Ku orikuruga hanu, nooba otafiire. Nooteekwa kugaruka, nangwa n'obu oraabe ori omusiisi, ocwerwe orubanja okurugiirira aha bikorwa ebyakozirwe omu mubiri. "Orusiisira oru orw'omu nsi egi ku rurisheenywa, twine orundi orututegyereize." En morph, ekigambo n'ekyo.

31 Hati, Ruhanga, omu kicweka eki eky'o . . . n'omu kicweka eki eky'okuhanga Kwe, bwanyima yaaba omuntu, Yesu. Okuruga omuri ki? Okuruga omu kutandika kukuru, Omwoyo, reeru yaashuma kuba Ekigambo, Naayeyoreka. Ekigambo tikiikekozire kyo kyonka, nikigambwa kwonka, en morph, bwanyima Yaaba omuntu, Yesu, orikufa, kuroza aha kufa ahabw'abasiisi twena.

Obu Abrahamu amubugana, akaba ari Melekizedeki. Naayoreka hanu eki ebimurimu byona birikora aha muheru, buri mwana wa Abrahamu. Buri mwana w'Okwikiriza naija buzima kukora ekintu nikyo kimwe. Kwonka niinyenda kureeba oku tushemereire kwija.

Nabwo, Nitumureeba ashuurwirwe hanu omuri Ruusi na-na Boazi, nk'Omunyabuzaare Omucunguzi, oku Yaabaire ashemereire kwija akaba omuntu.

Hati nitureeba ekimurimu, abaana b'Omwoyo We, tibakashushaine n'omubiri-Kigambo. Kureka, omubiri gw'obwaruhanga; omubiri ogu nigutegyekwa Ekigambo n'omukwato, gутегуерве omukwato, nikwo kuhindurwa kw'omubiri.

32 Hati, omutaano oguri ahagati Ye naiwe, nk'omwana. Waareeba, Akaba ariho, omu kutandika, Ekigambo, omubiri gwa en morph. Akataahamu yaagutuuramu, omu Muntu Melekizedeki. Reero, bwanyima, tituragarukire kuhurira ebya Melekizedeki bundi, ahabw'okuba akahinduka Yesu Kristo. Melekizedeki akaba ari Omunyamurwa, kwonka Akahinduka Yesu Kristo. Hati, ekyo okakiraba aha rubaju. Ahabw'okuba, omu nshusha egoo, Akaba Naamanya ebintu byona, kandi iwe tokabaasize kumanya ebyo nabwo.

Okaija nka Adamu, nkaanye, okaruga omu kimurimu waaba omubiri, kwohibwa. Kwonka amagara aga ku garihwaho hanu, "Orusiisira oru orw'omu nsi egi ku rurisheenywa, twine orundi orututegyereize." Okwo niyo turikuza; ekyo n'Ekigambo. Bwanyima nitubaasa kureeba enyima tureeba ebi twakozire. Hati titurikuyetegyereza. Titukabahoga Ekigambo; turi omuntu ow'omubiri, kitari Kigambo.

Kwonka, kandi reeba, buzima nikikyoreka kurungi, toriba Ekigambo na kakye kureka ku oraabe waabaire ori ekiteekateeko omu kutandika. Ekyo nikihamya okutoorana kwa Ruhanga. Waareeba? Torikubaasa kuba Ekigambo kureka waaba ori ekiteekateeko. Nooteekwa kuba waabaire ori omu kuteekateeka, okubanza.

Kwonka, nooreeba, kugira ngu oyohibwe, okaba nooteekwa kuraba aha rubaju omubiri gw'obwaruhanga. Okaba nooteekwa kwija hansi hanu omu mubiri, kwohibwa ekibi. Reero bwanyima, ku oraasingure, "Abu Tata Ampa boona baryaija Ahariinye, Naanye Ndyamuzoora omu biro by'aha muheru." Mwareeba, okaba nooteekwa kuba otyo okubanza.

33 Kandi bwanyima, nooreeba, Akaizira kimwe ahansi, omu muhanda gw'obutoosha, kuruga omu kimurimu kuza . . . Ensi etakahangirwe, eiziina rye ritairwe omu Kitabo ky'Amagara ky'Omwanwa gw'Entama. Reero, okuruga ahari ekyo, Akahinduka Ekigambo, omubiri gw'obwaruhanga, ogwabaire gureebeka, gukabura. Reero yaaba omuntu kandi yaagaruka omurundi ogundi, yaazoora omubiri ogwo nigwo gumwe omu mbeera ey'ekitiinisa.

Kwonka okaraba aha rubaju omubiri gw'obwaruhanga waahinduka omuntu w'omubiri, kwohibwa ekibi. Reeru, "Orusiisira oru orw'omu nsi egi ku rurisheenywa, twine orundi orututegyereize." Titukatungire emibiri ego.

Kwonka, reeba! Omubiri ogu ku gutunga Omwoyo wa Ruhanga, Amagara agatafa omuriyiwe, gareetera omubiri ogu kworobera Ruhanga. Haleluya! "Weena ozairwe Ruhanga takora kibi; tabaasa kukora ekibi." Abarooma 8:1, "N'ahabw'ekyo abari omuri Kristo Yesu tibakiine rubanja; tibakuratira by'omubiri, kwihiaho eby'Omwoyo." Nikyo ekyo. Waareeba, ekyo kireetera omubiri gwawe okworoba.

Torikwetenga kugira oti, "Oo, kuri nimbaasa kureka kunywa amaarwa! Kuri nimbaasa kwonka . . ." Taaha omuri Kristo kwonka, byona nibiza kugyenda, waareeba, waareeba, ahaw'okuba omubiri gwawe nigworobera Omwoyo. Niguba gutakitegyekwa bintu by'ensi; bifire. Bifire; ebibi byawe biziikirwe omu kubatizibwa, kandi ori ekihangirwe kisya omuri Kristo. Obwo omubiri gwawe, nigworobera Omwoyo, gugyezaho kutuura amagara marungi.

34 Nkaimwe abakazi abarikugira ngu mwine Omwoyo Orikwera, haza mukagyendagyenda hanu mujwaire ebijwaro bigufu munonga n'ebindi, nimubaasa muta kukora ekyo? Omwoyo wa Ruhanga omuriimwe naabaasa ata kubareka kukora ekintu nk'ekyo? Tikirkubaasa kuba kityo. Buzima, tikirkubaasika. We tari omwoyo mubi; We n'Omwoyo Orikwera.

Reero ku oyorobera Omwoyo ogwo, kikureetera weena kworobera Omwoyo ogwo. Kandi Omwoyo ogwo ti kindi kureka Embibo Kigambo egi eyorekirwe, nari okuhindurwa ehuriire, haleluya, kuhindurwa ehuriire. Kandi Baiburi yaagira eti, "Otakora eki," omubiri ogwo gukihindukira ahonaaho. Tihariho kibuuzo.

Ekyo niki? N'omukwato gw'okuzooka. Omubiri ogu guryazoorwa omurundi ogundi, ahaw'okuba gwatandikire. Rimwe gukaba gutegyekwa ekibi, n'eshabo n'okujunda, kwonka hati gwine omukwato; guhindukire ogw'Eiguru. Hati, ogwo n'omukwato ku orikuza omu Kutwarwa. N'omukwato.

Omuntu orwaike abyami, naafa, hatariho ekitsigaire kureka okufa; ebyo nibyo birikubaasa kubaho. Ndeebire abantu abahweire aha magufa, ekookoro ebariiriire kimwe n'akakonko; reero ndeeba abantu abo, akaanya kakye ahanyima y'ekyo, bakiriire kimwe kandi baine amaani. Ku haraabe hatariho Obutambi bwa Ruhanga, obwo tihariho okuzooka, 'habw'okuba Obutambi bwa Ruhanga n'omukwato gw'okuzooka. Amiina!

Noomanya esente z'omukwato eki ziri, tikwo? N'okushashuraho ekicweka ky'okubanza. "Akahutaazibwa ahaw'b'ebi'okushiisha byaitu, kandi emihiririzi Ye niyo etukiza." Yetegyereze oku kiri eky'okutangaaza! Nitumukunda.

35 Hati, omubiri ogu nigworobera Omwoyo. Titukataahire omu nshusha y'Ekigambo, kureka tukiri omu nshusha y'omubiri, beitu nitutegyekwa Ekigambo. Okufa omu mubiri nikwo kuritutwarayo.

Ekintu nikyo kimwe, teekateeka aha mwereere. Noobaasa kureeba omukazi, n'obu yaakuba ari mubi ata, yaaba aine enda ari haihi kuzaara. Mureebe, omwana ogwo atakazairwe, tindikufayo omukazi ogwo n'enshariizi ata, naaba omunyambabazi munonga. Hariho ekihinduka omu migambre ye . . . ereebeka erimu okutiina Ruhanga, kureeba omukazi mukye ori haihi kuzaara, ahaw'omwana. N'ahabw'enki? Omubiri ogwo omuto, hati, niguba gutakabaire oguhuriire nabwo, mwareeba, ekintu eki guri kyonka n'omubiri n'emitsi. Okwo kugurukyera kukye, egyo n'emitsi erikuba neeyesikura kwonka. Kwonka ku guzaarwa gukaruga omunda, Ruhanga agwikizamu omwitsyo gw'amagara, bwanyima ayamuza. Mwareeba, nk'oku-nk'oku buzima hariho omubiri ogw'obutoosha oguruhangwa, hariho omubiri gw'omwoyo ogw'okugwakiira ahonaaho gwahika hanu.

36 N'ahabw'ekyo, omuntu ku azaarwa obwa kabiri, kuruga omu Iguru, ahinduka omwereere ow'omwoyo omuri Kristo.

Kandi, reero, ekijwaro eki eky'omubiri ku kinagwa ahansi, habaho omubiri gw'obutoosha, omubiri ogw'obwaruhanga, omubiri ogutakozirwe n'emikono, n'obu kwakuba okuzaarwa omukazi, ogu tuzamu.

Reero omubiri ogwo gugaruka kandi gwakiira omubiri oguhairwe ekitiinisa.

Egyo niyo nshonga Yesu yaagiire okuzimu obu Yaafa, kandi akabuurira emyoyo eyaabaire eri omu nkomo; akagaruka omu mubiri ogwo ogw'obwaruhanga. Oo, nikitangaaza! Ruhanga asiimwe!

Ekitabo ky'Abakorinso kya Kabiri 5:1, "Omubiri gw'omu nsi ogu ku gurisheenywa, orusiisira oru orw'omu nsi, twine orundi." Mwareeba, ogwo tukaguraba aha rubaju, kurugira kyarimwe ahari Ruhanga, ekimurimu; kuba omuntu, okwohibwa n'okugyezibwa ekibi, nk'oku kyabaire ahari Adamu. Kwonka okugyezibwa kw'Ekigambo Kye ku kuhwaho, obwo tutwarwa omu mubiri ogu ogwatuteekyeirwe ensi etakahangirwe. N'Ekigambo aho eki twagurukire, okwizira kimwe, ahansi hanu kwohibwa n'okugyezibwa. Kuri twarabire omuri guri, tihaakubaireho okwohibwa; tukaabaire nitumanya ebintu byona. Niyo nshonga ahaw'enki Yesu yaabaire naamanya ebintu byona, 'habw'okuba Akaba ari Ekigambo atakabaire omuntu. Bwanyima tuba Ekigambo.

Hanu tuhangwa omu nshusha y'Ekigambo, kuba abakwataniise omu Kigambo, kurya Ekigambo, ahaw'okushoroorwa ira okuruga omu kutandika; nooreeba ako n'akacweka kakye k'Amagara aku waabaire oine

omuriiwe okuruga omu kutandika, obu waatandika orugyendo rwawe. Baingi omuriimwe nimubaasa kukijuka. Okeegaita aha kanisa egi waayegaita n'aha kanisa eriya, okaba ogyezaho eki na kiri; tihaine ekyakuhaagize. Ekyo kihikire. Kwonka eizooba rimwe Okakyetegyereza. Kihikire.

37 Ekiro kiri nkaba ninyegyesa ahantu nanka, nintekateeka hakaba hari omuri California nari Arizona, ahari . . . Niinyikiriza nkagamba okitebyo kikye hanu, aha mutu owaabaire aine enkoko eraariire kandi akata eihuri ry'empungu ahansi yaayo. Kandi empungu egoy ku yaayatwirwe, ekaba eri enyonyi erikureebeka omu muringo ogurukukirayo kushetsya ei obwo bwana bw'enkoko burareebire. Kwonka, ekaba egyendagyenda aho. Niyo yaabaire-niyo yaabaire neereebeka kubi omuribwo, ahabw'okuba ekaba etarikubaasa kwetegyereza oku enkoko egoy erikweterera kandi ekaraha omu kirundo kya kasasiro ekyo ekarya. Ekaba etarikubaasa kukyetegyereza. Ekaba egira eti, "Ija hanu kandi orye, mukundwa!" Kwonka, ekaba eri empungu; ekaba etafa kurya batyo. Bikaba bitari by'okurya byayo.

N'ahabw'ekyo ekaba ekwata enseenene n'ebindi byona, noomanya, kandi eyeta obukoko buto. Obukoko obwo bwona bukaba bwija, burikweterera, kandi burya. Kwonka empungu nto egoy ekaba etarikubaasa kukikora. Bikaba-bikaba bitagireebekyera kurungi.

N'ahabw'ekyo eizooba rimwe nyina ekaija neegisherura.

38 Ekaba ehurira egoy nkoko neeyeterera. Ekaba egeyzaho oku erikubaasa kweterera, kwonka ekaba etarikubaasa kukikora. Ekagyezaho kugamba nk'obukoko buto, kwonka terabaasize kukikora. Mwareeba, ekaba eri empungu. Yo, okubanza kwa byona, ekaba eri empungu. Ekaaturirwa ahansi y'enkoko kwonka.

Ekyo ni nka baamemba bamwe ab'ekanisa. Buri . . . Ekyo haihi nikwo kiri; nk'omwe wenka omu kibiina, niwe ohikire.

Kwonka eizooba rimwe nyina ekaguruka ahaiguru aho kandi yaagamba n'eiraka rihango. Yaaryetegyereza. Ekaryetegyereza kurungi. Ahabw'enki? Ekaba eri empungu, okubanza kwa byona.

Nikwo kiri n'Engiri, nari Ekigambo, nari Amaani ga Yesu Kristo. Omuntu ku arikuba yaashororoirwe ira Amagara Gatahwaho, haza akahurira okwo kugamba kw'amazima, okugamba munonga kwa Ruhanga, tihaine ekirikubaasa kukimuzibira.

Ekanisa neebaasa kugira eti, "Ebiro by'ebi'amahano bikahwaho," kuru, kuru, kuru. "Yemerera hanu orye ebi, kandi oyemerere hanu orye biriya."

Eby'okurya ebyo ebisiisikaire eby'omu kibuga haihi n'ekihumi tibimushemereire, bundi. Yaagyenzire! "Byona nibibaasika!" Naaguruka.

Ego niyo nshonga, ogwo nigwo murabanamu gw'Abakristaayo baingi eriizooba, tibarikubaasa kwisha ebogyere byabo ahansi.

Nyina waayo okuzire yaagira ati, "Mutabani, guruka! Ori empungu. Ija ahaiguru hanu ahi ndi."

Yaagira eti, "Maama, tinkagurukahoga, omu magara gangye."

Yaagira eti, "Mbwenu, iwe guruka! Ori empungu, okubanza kwa byona. Tori nkoko." N'ahabw'ekyo ekaguruka omurundi gwayo gw'okubanza kandi yaateerateera amapapa gaayo; teragurukire kurungi munonga, kwonka ekaruga aha itaka.

Okwo nikwo tukora. Twakiira Ruhanga ahabw'okwikiriza, ahabw'Ekigambo ekihandiikirwe. Hariho ekirimu aho; n'ago Magatahwaho. Okagashoroorerwa ira.

Ishenkuruyo na nyinenkuruyo zikaba ziri empungu. Ekaba ari empungu, okurugira kimwe enyima. Empungu tejwanga n'ebindi bintu. Teri nkyootera; ngaaha. N'empungu.

39 Reero, ku waaherize kwetegyereza ku Ekigambo kya Ruhanga kyonyini kyabaire kiri Eby'okurya by'Empungu, obwo okatsigaho ebindi bintu. N'ahabw'ekyo ohangirwe kuba ekishushani ekihuriire kya Ruhanga ohuriire. Okahurira okuruga aha mubiri gwawe gw'obwaruhanga. "Omubiri ogu ogw'omu nsi egi ku gurisheenywa, twine ogundi ogutegyereize."

Noogira oti, "Ekyo kihikire, Ow'eishe-emwe Branham?"

Ni kirungi, reka tutwareho empungu nkye tuzeetegyereze edakiika nkye. Hakabaho eiziina, omuntu orikwetwa Musa. Buri omwe naamanya ku nabi ayetwa empungu, omuri Baiburi.

Hakaba hariho nabi orikwetwa Musa. Kandi eizooba rimwe Ruhanga akamweta, kandi taramwikiriize kuza omu nsi egoy, kandi ya-yaafeera aha rukiri. Baamaraika baamutwara baamuziika.

Hakaba hariho omuntu ondijo, empungu, nangwa n'okufa tarafiire. Akambuka Yorudaani kwonka, kandi Ruhanga yaayohereza ahansi ekigaari ekirikukururwa embaraasi; kandi ekijwaro eki eky'omubiri yaakinaga, kandi

yaimuka yaakwata ekihembo eky'ebiro n'ebiro.

Emyaka magana munaana bwanyima, emyaka magana munaana bwanyima, aha Rushozi rw'Okuhindurirwaho, hanu hakeemereraho abashaija babiri abo. Omubiri gwa Musa gukaba gumazire emyaka amagana n'amagana gujunzire, kwonka ngugwo akaba ari aho omu nshusha egoo okuhitsya nangwa n'obu Petero, Yakobo na Yohaana baamwetegyereize. Amiina! "Orusiisira oru orw'omu nsi egi, ku rurisheenywa," ku oraabe ori ekicweka kya Ruhanga ekyorekirwe hanu omu nsi, "oine omubiri ogutegyereize ku oriruga omu nsi egi." Bakaba bari aho, beemereire aha Rushozi rw'Okuhindurirwaho, omu mibiri yaabo y'obwaruhanga. Ahabw'okuba bakaba bari baanabi abu Ekigambo kyaiziire.

40 Nabwo ka twetegyereze nabi ondijo, obwire bumwe, owaabaire naayetwa Samueli. Akaba ari omuntu w'amaani. Akaba yaayegyeise Israeli; yaabagambiire ku batashemereire kugira omugabe. Yaagira ati, "Hariho obu ndabagambiire ekintu kyona omu Iziina rya Mukama haza kitahikiirire?"

Baagira bati, "Ngaaha. Byona ebi ogamba obutoosha omu Iziina rya Mukama bihikiirira."

Akaba ari nabi, kandi akafa.

Nk'emyaka eshatu nari ena eyaakuratiireho, omugabe akatunga ekirikumugwisa kubi; obwo bukaba buri obu eshagama ya Yesu yaabaire etakasheeshirwe. Akaba ari omuri paradiiso. Omurogikazi wa Endoori akeeta omuntu kurugayo, kuhuumuriza Saulo. Kandi omurogikazi ku yaareebire naarugayo, yaagira ati, "Nindeeba ruhanga naaruga okuzimu."

41 Kandi ahanyima y'ogwo muntu kufa, akaziikwa, kandi akajundira omu kituuro, ngugu akaba ayemereire aho omu nyanga egoo, ajwaire omunagiro gwe gwa nabi; kandi akaba akiri nabi, amiina, ahabw'okuba akagira ati, "Ahabw'enki waanyomberera okaanyiha omu kuhuumura kwangye, ku oraabe noomanya ngu ohindukire omuzigu wa Ruhanga?" Mureebe naaragura. Ati "Nyencakare ekiro, nk'aga magingo noija kunshanga ei ndi." Akaba akiri nabi, n'obu yaabaire arugire omu mubiri ogu.

Mwareeba, akaba aizire hanu kandi akaba ari ekicweka ky'Ekigambo ekyo, kandi akataaha yaaruga omu magara g'omubiri yaaza omu mubiri ogwamuteekyeirwe omusingye gw'ensi gutakateirweho. Akataaha omu mubiri gw'obwaruhanga, ogwabaire guri Ekigambo. Mwakyetegyereza? Omwo nimwo abaikiriza boona baza ku turuga hanu.

Reero, omu nshusha egoo, omukingo obwo gwihwaho. Nooreeba, ori Ekigambo, nabwo, ku orikutaaha omwo. Nk'omwerefere; nk'oku naaheza kugamba . . .

Hati yetegyereze. Ruhanga asiimwe ahabw'Obumanyiso obu kubambuurwa, nikwo kushaba kwangye, kumanya ebantu ebi!

42 Hati okushuuruirwa kw'amazima kwa Melekizedeki nikureebeka. Niki? Akaba ari Ruhanga, Kigambo, Atakabaire omuntu; Ruhanga, Kigambo. Hakuba, Akaba naateekwa kuba kwo; tihaine ondijo weena orikubaasa kuba otafa Nkawe. Mwareeba, nkaba nyine tata na maawe; naiwe, okaba obaine. Yesu akaba aine ishe na nyina. "Kwonka Omuntu ogu akaba ataine ishe, nari nyina." Yesu akaba aine obutandikiro bw'amagara; Omuntu ogu akaba atabwine. Yesu akahayo Amagara Ge; Omuntu ogu akaba atarikubaasa, ahabw'okuba Akaba ari Amagara. Kandi niwe Omuntu ogwo omwe obwire bwona. Ninyesiga ngu Ruhanga naaza kukikushuuruirwa. Omuntu niwe ogwo omwe, obwire bwona.

Yetegyereze ekyeterero Kye, "Omugabe w'okuhikiirira." Hati, Abaheburaayo 7:2, "Omugabe w'okuhikiirira, kandi Omugabe w'obusingye." We ni abagabe babiri. Hati reeba, Abaheburaayo 7:2, "Omugabe w'okuhikiirira, nabwo Omugabe w'obusingye." We ni abagabe babiri aho. Hati obu Yaija omu mubiri kandi omubiri Gwe gukatwarwa omu iguru, omu kitabo ky'Okushuuruirwa 21:16, Naayetwa, "Omugabe w'abagabe." Niwe byona bishatu, hamwe. Mwareeba, Omugabe Ruhanga, Omugabe omubiri gw'obwaruhanga, Omugabe Yesu. "We n'Omugabe w'abagabe."

Byona bikwataine, nk'omwoyo, omubiri, n'amagara, byona biba kimwe.

Nabwo, Niwe Isheboona, ekyo nikyo kyabandize; Omwana; n'Omwoyo Orikwera, Omwoyo.

"Omugabe w'okuhikiirira," ekimurimu ky'Omwoyo; omubiri gw'obwaruhanga, "Omugabe w'o-w'obusingye," omubiri gw'obwaruhanga; kandi omu mubiri Akaba ari "Omugabe w'abagabe," Omuntu niwe omwe.

43 Ari omubiri gw'obwaruhanga, Musa Akamureeba, Okuruga 33:2, Akaba ari omubiri gw'obwaruhanga. Musa akaba naayenda kureeba Ruhanga. Akaba yaahuriire eiraka Rye, Yaamuhuriire naagamba nawe, Yaamureebire aho omu rushaka, nk'Enyomyo mpango ey'Omuriro. Yaagira ati, "Ori oha? Niinyenda Kukumanya." Musa nikwo yaagizire. "Ninza kuta . . ." "Ku Oraanyikirize Nkakureeba, niinyenda kureeba aha maisho Gaawe.

Yaagira ati, "Tihaine omuntu orikubaasa kureeba aha maisho Gangye." Yaagira ati, "Niinyija kuta ekiganja Kyangye aha maisho gaawe, Nkuhingureho. Kandi noobaasa kureeba omugongo Gwangye, kwonka hatari aha maisho Gangye." Mwareeba? Kandi ku Yaakikozire, gukaba guri omugongo gw'Omuntu; gukaba guri omubiri

gw'obwaruhanga. Mbwenu Ekigambo ekyaziire Musa, "MBAHO," ogwo akaba ari Kigambo. Kigambo akaija ahari Musa omu nshusha y'Enyomyo y'Omuriro omu rushaka orurikwaka omuriro, ogwo "MBAHO."

Nk'Ekigambo kuruga omu by'ediini . . . kuruga omu mubiri gw'obwaruhanga, nimmanyisa. Munsaasire. Akaija ahari Abrahamu nk'Omuntu, ahansi y'omuti gw'omwela. Hati reeba aho. Hakaija Omuntu ahari Abrahamu, bakaba bari bashatu, baashutama ahansi y'omuti gw'omwela, bari bashatu. Kandi yetegyereze, ku yaaherize kugamba na Abrahamu . . .

44 Ahabw'enki Yaizire? Abrahamu, ahabw'okuba niwe yaabaire aine okuraganisibwa n'obutumwa bw'omwana owaabaire naija kuzaarwa, nabwo akaba ari nabi-Kigambo wa Ruhanga owaabaire naayesiga Ekigambo kya Ruhanga, naayeta ekintu kyona ekirikuhakanisa nk'ekitariho. Mwareeba nk'oku Ekigambo kiri ekihikiriire? Ekigambo kikaizira nabi. Mwareeba, Ruhanga akaba ari aho omu mubiri gw'obwaruhanga. Baiburi ekagira eti, "Ekigambo kikaizira nabi." Hanu hakaba hariho E-Ekigambo omu mubiri gw'obwaruhanga.

Hati noogira oti, "Ogwo akaba ari Ruhanga?"

Abrahamu akagira ngu akaba ariwe. Akagira ngu eiziina Rye, rikaba riri, Akamweta Elohim. Hati omu kitabo ky'Okutandika 1, nooshanga ngu, "Omu kutandika Elohim akahanga eiguru n'ensi." Omu kitabo ky'Okutandika 18, nitushanga ngu-Abrahamu akeeta Omuntu ogu . . . owaashutamire aho akagamba nawe, kandi akaba naabaasa kumugambira enaama z'omu mutima gwe, akamugambira ebi Saara yaabaire naateekateeka enyima Ye. Abrahamu akagira ati, "Ni Elohim." Akaba ari omu nshusha y'omubiri gw'obwaruhanga. Mwakyetegyereza? Yetegyereze ahanyima . . .

45 Hati nitushanga ngu obwo Akaba ari omu nshusha y'omubiri gw'obwaruhanga. Akamweta, "Mukama Ruhanga, Elohim." Hati, omu kitabo ky'Okutandika 18, nitushanga ngu ekyo n'amazima.

Hati yetegyereze Abrahamu. Bakaba bari bashatu bari hamwe, kwonka Abrahamu ku yaabugaine bonshatu abo, yaagira ati, "Mukama wangye."

Kwonka Looti we, eifo omuri Sodoma; babiri aharibo ku baashuumireyo, Looti akareeba babiri aharibo nibaija, yaagira ati, "Bakama bangye." Mwareeba, ekaba eri nshonga ki? Eky'okubanza, Looti akaba atari nabi, ekyo kihikire, n'obu yaakuba entumwa y'obwire, n'ahabw'ekyo Taramushuururiirwe. Ekyo kihikiire kimwe buzima. Looti akaba naabaasa kubeeta "abakama." Baingi, nabwo akaba naabaasa kugira ngu, "abakama."

Kwonka n'obu Abrahamu yaakureebire abarikwingana bata, nabwo akaagumire ari Mukama omwe. Ogwo ni Ruhanga. Ogu akaba ari Melekizedeki.

Mwetegyereze, orugamba ku rwahweire, Melekizedeki yaagaburira omwana We omusinguzi omugaati na viinyo; teekateeka ahari ekyo, ekicweka Kye We wenka! Hati nitwenda kureeba hanu. Omu kirikushushanisa hanu, nihareebeka, okuza aha meeza. Ahanyima y'orugamba, Akeehayo We wenka, ahabw'okuba omugaati na viinyo n'ekicweka kya Kristo. Kandi orugamba ku ruhwaho, waaheza kuteerwa munonga, obwo nibwo orya ahari Kristo, okaba ekicweka ky'Oriho ogu. Mwakyetegyereza?

46 Yakobo akafukaana ekiro kyona, kandi yaayanga Kumurekura okuhitsya obu Yaamuhaire omugisha. Ekyo kihikire. Akarwanira amagara! Kandi orugamba ku ruhwa, obwo Ruhanga Naakweha We wenka. Egyo niyo meeza ya Mukama Ye ey'amazima. Akagaati kakye kandi keebumburikire kajwekyera Eki kwonka. Toshemereire kukarya kwihamo waaba ofukaine kandi ohindukire ekicweka kya Ruhanga.

Mwijukye, obwire obu, emeeza ya Mukama ekaba etakateirweho, okuhitsya obu Yesu Kristo yaafiire, emyaka amagana n'amagana n'amagana bwanyima.

Kwonka Melekizedeki, ahanyima y'omwana We Abrahamu kusingura, Melekizedeki akamubugana kandi yaamuha viinyo n'omugaati; naayooreka ngu orugamba rw'ensi egi ku rurihwa, Turyamubugana omu kaabunga kandi turye emeeza ya Mukama omurundi ogundi. Eryaba eri Kyakiro y'obugyenzi bw'Okugaitwa. "Tindinywa hari viinyo bundi, nari kurya aha bijuma, okuhitsya obu Ndibiry, kandi nkaginywa naimwe busya, omu Bukama bwa Tata." Ekyo kihikire?

47 Yetegyereze omurundi ogundi, Melekizedeki akaza kubugana Abrahamu atakahikire omu ka. Ka n'ekirikushunisa kirungi eki twine hanu! Melekizedeki naabugana Abrahamu atakahikire omu ka, ahanyima y'orugamba.

Nitubugana Yesu omu kaabunga, tutakahikire omu ka. Ekyo kihikire. Ekitabo ky'Abatesalonika kya Kabiri nihatugambira ekyo, ahakuba, "nitumubugana omu kaabunga." Ekirikushushanisa kirungi kya Rebeka naabugana Isaaka, omu musiri, omu mabeho g'omwebazyo. "Nitumubugana omu kaabunga." Ekitabo ky'Abatesalonika kya Kabiri nihatugambira hatyo. "Itwe abahuriire abarishangwa bakiriho tituritanga nari okuzibira abo abaagwejeyeire; ahabw'okuba enzamba ya Ruhanga eryagamba; kandi abaafeereire omuri Kristo nibo baribanza kuzooka; naitwe abahuriire abariba bakiriho turyatwarwa nabo, kubugana Mukama omu kaabunga." Bihikire, ebirikushushanisa ebi byona.

N'ahabw'ekyo, omubiri gw'obwaruhanga, ku orikufa kandi okataaha omu mubiri ogwo gw'obwaruhanga,

(habaho ki?) omubiri gw'obwaruhanga gwija omu nsi kutwara omubiri ogucungwirwe. Kandi ku oraabe ori hanu omu kaabunga, noogyenda n'omubiri kubugana omubiri gw'obwaruhanga, nikyo ekkyo. "Tutwarwe, kubugana Mukama omu kaabunga."

Melekizedeki ogu t'ondiijo kureka ni Ruhanga!

48 Hati nitureeba hanu butunu enaama ehweire ey'amagara gaitu omu rugyendo, n'omu kufa, n'ahu tuza twaheza kufa. Nabwo, okutooranwa ira tutakabaireho nikureebwa butunu hanu. Hati hurikiza twaba nitwegyesa eki, kurungi.

Ekicweka ky'e-ky'ekigyendererwa Ekitahwaho eki Yaabaire aine omu mubonano Gwe hati kishuurwirwe. Mwetegyereze, hakiriho ebicweka bishatu okuhika aha kuhikiirira. Nk'oku Arikucungura ensi; omuringo nigwo gumwe ogu Acunguriram Ekanisa Ye. Acungura abantu omu bicweka bishatu. Hati reeba. Okubanza n'okwiwhaho orubanja, nk'oku Luteeri yaabuuriire; ekya kabiri, okwezibwa, nk'oku Wesili yaabuuriire; ekya kashatu, okubatizibwa n'Omwoyo Orikwera. Ekkyo kihikire. Reero haija Okutwarwa!

Hati, ensi, Akacungura ata ensi? Eky'okubanza, eki Yaakozire, obu yaashiisha, Akagyozya omu kubatizibwa n'amaizi. Ekkyo kihikire. Reero Yaagisheeshaho eshagama Ye, kuruga aha musharaba, Yaagyeza kandi Yaagyeta Eye. Obwo Akora ki? Nk'oku Yaihire ensi yoona omuriyiwe, kandi akakuhindura musya weena okurabira omu kubatizibwa n'Omwoyo Orikwera okw'omuriro, nikwo Arikuz kuhunduuza ensi. Kandi neeza kwokibwa Omuriro, kandi amareho buri kakooko, okuhika za mailo miriyoni ahaiguru, buri kintu kyona nikiza kumarwaho. Reero bwanyima hariho Eiguru risya n'Ensi nsya, nk'oku ori ekihangirwe kisyia omuri Kristo Yesu Omwoyo Orikwera yaakwijaho. Mwareeba, nikyo ekkyo, ekintu kyona nikireebwa butunu nk'oku kirikubaasika. Buri kintu kiri omu bushatu.

49 Okuzaara kw'obutoosha kuri mu bushatu. N'ekintu ki ekibaho okubanza aha mukazi orikuzaara omwana? Ekijja okubanza niki? Amaizi. Ekikurataho niki? Eshagama. Ekirikukurataho niki? Amagara. Amaizi, eshagama, amagara.

Habaho ki aha kimera? Kijunda. Ekintu ky'okubanza niki? Omushengye. Ekikurataho niki? Eshisha. Hakurataho ki? Ekishushu. Reero enjuma eruga omuri ebyo. Amadaara ashatu gaakyo gonka, okuhistya obu kihika aha njuma. Nikwo buzima.

Ruhanga ayoreka ekkyo. Ekkyo obutoosha kituura kihikire. Ruhanga ayoreka kuba amazima. Ayoreka butunu ngu, abaatoorainwe ira batakabaireho nibo bonka abarikuteekatekwaho omu kucungurwa. Mwakyetegyereza? Reka ngambe ekkyo omurundi ogundi. Abaatoorainwe ira batakabaireho nibo bonka abarikuteekatekwaho omu kucungurwa. Abantu nibabaasa kuba nibeehindura kwo, nibateekateeka ngu nikwo bari, kwonka okucungurwa okuhikire n'abo abaatoorainwe ira batakabaireho. Ahabw'okuba, ekkyo kigambo kucungurwa nikimanyisa "okugarura." Ekkyo kihikire? Okucungura n'ekintu . . . Okucungura ekintu kyona, ni, "okukigarura omu mwanya gwakyo ogwabandize." Haleluya! N'ahabw'ekkyo abaatoorainwe ira batakabaireho bonka nibo barigarurwa, ahabw'okuba abandi tibarakomookire Okwo. Mwareeba, "kugarura."

50 Kuba Otahwaho hamwe Nawe, omu kutandika . . . Amagara Agatahwaho agu waabaire oine, ekiteekateeko Kye ky'eki waabaire ori, kwonka, Akaba naayenda ngu o . . . Akaba naayenda ngu nyemerere aha kituuti, tugambe. Akaba naayenda ngu oshutame omu ntebe ekir eki. Obwo nituba nituhikiiriza ekigyendererwa Kye Ekitahwaho. Kandi ogwo owaarugire omu ka, akaija omu nsi kuhikiiriza ekigyendererwa Kye kyonka. Ekkyo kihikire? Ni kirungi. Reero, ekkyo ku kihwa, ogarurwa omu mbeera ey'ekitiinisa; okura kandi ogarurwa omurundi ogundi.

Tikiri ky'okutangaaza Paulo akaba naabaasa kugamba, obu baabaire nibombeka ekibaaho kucweraho omutwe gwe; akagira ati, "Iwe rufu, oruburi rwave rurahi? Iwe kituuro 'we, okusingura kwave kurahi? Kwonka Ruhanga asiimwe, Otuha okusingura!" Akagira ati, "Rufu, ngambira ahu orikubaasa kutuma naaborooga! Kituuro 'we, ngambira oku orikuza kunkwatinamu! Ahakuba, nyine Amagara Agatahwaho." Amiina! Akakyetegyereza. Rufu, okuzimu, ekituuro, tihaine ekyakubaasize kumukwatinayo. Kandi tihaine ekirikubaasa kutukora kubi, twine Amagara Agatahwaho! Akakimanya ngu akaba ahairwe omugisha n'Amagara Agatahwaho.

51 Nk'akatondo kakye k'orume. Ku ndaabe niinyetegyereza, kari . . . Tindikumanya bingi aha bikwatiraine na Kemesiture. Kwonka, nikiteekwa kuba ngu n'e-n'embeho nari omuyaga kuhinduka amaizi. Kandi ekir ku kifuka kandi kyagira omwirima, kagwa okuruga omu mwanya ahaiguru karagara ahansi. Kaine ahi karikugwa. Kwonka akasheeshe akarikukurataho eizooba ritakaturukire, kaba kari aho, akantu kakye ako, nikatitira. Kwonka reka eizooba ryake, kareebe nikatandika kwangaashana. Kashemereirwe. Ahabw'enki? Eizooba niriza kukeeta kugarukira ahu kaarugire.

Kandi nikwo n'Omukristaayo ari. Haleluya! Nitumanya ku turikuza omu Kubaho kwa Ruhanga, ekintu omuriitwe kitugambira ku twine ahu twarugire, kandi nitugarukayo omurundi ogundi ahabw'Amaani ago agarikutukurura.

Ako katondo kakye k'orume, kamwamwatikana kandi kangaashana kandi kateera akaari, ahabw'okuba kamanya ku kaarugire ahaiguru okwo, kandi ku eizooba ririkuza kukakurura rikakatwara ahaiguru omurundi

ogundi.

Kandi omuntu ori ekiri omuri Ruhanga, ozairwe Ruhanga, naamanya, haleluya, ku abugana Omwana wa Ruhanga, naija kutwarwa arugye hanu eizooba rimwe. "Naanye ku Ndiihwa aha nsi, Ndyairiza abantu boona Ahariinye." Amiina!

52 Hati yetegyereze, hati, nitureeba Melekizedeki n'ahabw'enki Mariamu yaabaire Atari nyina. Egyo niyo nshonga eyaatumire naamweta "mukazi 'we," atari maawe. "Akaba ataine ishe," ahabw'okuba Akaba ari Isheboona, Tataitwe otahwaho, bishatu omuri ogwo Omwe. "Akaba ataine nyina." Buzima akaba atamwine. Akaba ataine Ishe, ahabw'okuba akaba ari Isheboona. Nk'oku rimwe omuhimbi w'ebiyeshongoro yaagambire, naasingiza Yesu, akagira ati:

MBAHO owaagambire na Musa omu rushaka orurikwakamu omuriro, MBAHO Ruhanga wa Abrahamu, Enyonyoozi y'omu kasheeshe Erikurikumurinkana.

MBAHO Alufa, Omega, ow'okubanza okuruga aha muheru.

MBAHO w'ebihangirwe byona, kandi Yesu niryo Eiziina.

(Ekyo kihikire.)

Oo, mugira ngu Mb'oha, kandi bo bagira ngu Nkarugahi,

Nimumanya Tata, nari nimubaasa kugamba Eiziina Rye? (Haleluya!)

Eryo niryo Eiziina ry'Isheboona! Eego, "Nyizire omu Iziina rya Tata, Timwanyakiira." Mwareeba? Buzima, Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona.

53 Kandi Melekizeki ogu yaaba omuntu. Yaayeshuurura We wenka nk'Omwana w'omuntu obu Yaija, nka Nabi. Akaija omu maziina ashatu g'Omwana; Omwana w'omuntu, Omwana wa Ruhanga, Omwana wa Daudi.

Obu Yaabaire ari hanu omu nsi, Akaba ari Omuntu, kuhikiiriza Ekyahandiikirwe. Musa akagira ati, "Mukama Ruhanga waanyu aryabaimukiza Nabi nkaanye." N'ahabw'ekyo Akaba naateekwa kwija nka Nabi. Taragambire, Taragizire ngu, "Ndi Omwana wa Ruhanga." Akagira ati, "Ndi Omwana w'omuntu. Nimwikiriza Omwana w'omuntu?" Ahakuba, ekyo nikyo Yaabaire naateekwa kuhamya, ahabw'okuba ekyo nikyo Yaabaire ari.

Hati Aizire omu Iziina erindi ery'omwana, Omwana wa Ruhanga; ogwo otarikureebwa, Omwoyo.

Kandi ku Arigaruka omurundi ogundi, N'Omwana wa Daudi, okushutama aha kitebe Kye ky'obukama.

54 Hati obu Yaabaire ari hanu kandi akaba omuntu, Akaba naayetwa, "Omwana w'omuntu." Hati, Akeemanyisa We wenka ata ensi nk'Omwana w'omuntu, Nabi ori?

Eizooba rimwe nkaba nintebya ekitebyo kya Petero na Anderea, omurumuna. Bakaba bari abajubi, kandi ishebo Yona akaba ari omwikiriza mukuru okuzire. Eizooba rimwe bakagira ngu akashutama aha rubaju rw'obwato. Yaagira ati, "Batabani, nimumanya oku twashabire obu twabaire nitwetenga eby'enyanja." Bakaba bari abajubi abashubuuzi. Yaagira ati, "Tukeesiga Ruhanga, Yehova, kugira ngu tubebo. Mbwenu ndiyo ninkura; tinkibaasa kuguma naimwe boojo 'mwe obwire bureangwa. Kandi obutoosha nyowe, nk'abaikiriza boona ab'amazima, ntuura ntegyereze obwire obu Mesia ogwo aryaiziramu. Tutungire ab'ebishuba b'emiringo yoona, kwonka nihaza kwija Ow'amazima, eizooba rimwe." Kandi yaagira ati, "Mesia ogu ku aryaija, tindikwenda imwe boojo 'mwe ngu mubeihabeihwe. Mesia ogu tarikwija kuba otendekirwe omu by'ediini. Naaza kuba ari Nabi, ahakuba nabi waitu Musa, ou turikukuratira, nikwo yaagizire."

Hati, Omuyudaaya weena naikiriza nabi we. Ayegyesibwa kumanya ekyo. Kandi nabi ku agamba ekintu kikabakwo, obwo ago gaba amazima. Kwonka Ruhanga akagira ati, "Omuriimwe ku haraabe harimu, ow'omwoyo, nari nabi, Nyowe Mukama Ndyamwemanyisa. Kandi eki arigamba ku kirihikiirira, obwo mumuhurikize kandi mumutiine; kwonka ku kiryaba kitahikiire, obwo murekye kumutiina na kakye." Mwareeba? N'ahabw'ekyo okwo nikwo kwabaire kuba oku-okuhamibwa kwa nabi.

55 "N'ahabw'ekyo Musa akaba ari nabi owaahamiibwe kurungi, kandi akagira ati, 'Mukama Ruhanga waanyu aryabaimukiza, nabi nkaanye, omuriimwe, okuruga omuri beene waanyu. Kandi omuntu weena oryanga kumuhurira aryacuubwaho aihwe omu bantu.'" Yaagira ati, "Hati, baana 'mwe, mwijukye, ngu, nk'Abaheburaayo, nitwikiriza baanabi ba Ruhanga abahamiibwe."

Hati hurikiza kurungi. Otakifeerwa. Kandi yaagira ati, "Mesia ku ariija, Muryamumanya, ahakuba Aryaba ari Nabi-Mesia. Hati, bakagira ngu hahweireho emyaka magana ana. Titukatungire nabi okwiha omu bwire bwa Malaki, kwonka aryaija!"

Eizooba rimwe, ahanyima y'okufa kwe, emyaka mikye, omutabani we Anderea akaba naagyendagyenda aha nkungu. Yaahurira omushaija omuny'eihamba naaruga omu ihamba, naagira ati, "Mesia ogwo ayemereire omuriimwe hati!" Egyo mpungu mpango eyaimukire omu ihamba kandi ekaguruka ahaiguru aho, ekagira eti,

“Mesia ari omuriimwe hati hati. Titukamumanyire, kwonka Ayemereire omuriimwe. Ninza Kumumanya, ahabw'okuba niinyija kureeba akamanyiso nikaruga omu Iguru.”

Eizooba rimwe akagira ati, “Aho, mureebe, Omwana gw'Entaama wa Ruhanga orikwihaho ekibi ky'ensi!”

Yaagyenda . . . omushaija ogu yaagyenda, yaaza kusherura omurumuna. Yaagira ati, “Simooni, niinyenda ngu oije hanu; tuboine Mesia.”

“Oo, gyenda kuri, Anderea! Nooyetegyereza okukira aho!”

“Oo, nimmanya. Kwonka, ekyo, Omushaija ogu n'ow'omutaano.”

“Ari nkahi? Naaruga nkahi?”

“Yesu owa Nazareesi”

“Orwo rurembo rukye, rw'enkozi z'ebibi? Ahabw'enki, Tarikubaasa kuruga omu mwanya gw'enkozi z'ebibi kandi omurofa nk'ogwo.”

“Iwe ija oreebe kwonka.”

Aha muheru akamwikiririsa kushuumayo ekiro kimwe. N'ahabw'ekyo ku yaizire omu maisho ga Mesia ogu, Yesu ayemereire aho, naagambira abantu. Ku yaahikire omu maisho Ge, yaagira ati, “Eiziina ryawe ori Simooni, kandi ori omwana wa Yona.” Ekyo kikamara. Akatunga ebishumuruzo by'Obukama. Ahabw'enki? Akamanya ku Omushaija ogwo yaabaire atarikumumanya. Mbwenu Akamumanya ata, na ishe oriya omugurusi orikutiina Ruhanga owaabaire yaamwegyeise oku barikwikiriza Mesia?

56 Hakaba hariho omushaija ayemereire aho, eiziina rye Filipo, oo, akashemererwa munonga! Akaba naamanya omushaija ondijo, ou yaabaire ashoma Baiburi nawe. Yaagyenda, yaayetooroora akabungo, yaamushanga omu musiri gwe gw'emitiini. Akaba atsimbire amaju, naashaba. Bakaba baatungire amashomo maingi ga Baiburi hamwe, n'ahabw'ekyo akarugayo. Kandi yaagira ati, ku yaaherize kushaba, yaagira ati, “Ija, oreebe Ou tureebire; Yesu owa Nazareesi, mutabani wa Yosefu. Ni Mesia ou turikusherura.”

“Hati Nimbaasa kuhurira Nasanaeli naagira ati, ”Hati, Filipo, otaba waarengesereza, tikwo?“

“Oo, ngaaha. Ngaaha. Hati reka nkugambire. Noomanya, tubaire nitwega Baiburi hamwe, kwonka nabi akagamba ngu Mesia aryaba ki?”

“Aryaba Nabi.”

“Noijuka oriya mujubi okuzire ou waaguzireho eby'enyanja, owaabaire ataine bwegyeso oburikumara kumubaasisa kuhandiika eiziina rye, orikwetwa Simooni?”

“Eee. Ahaa.”

“Akaija. Noomanya ki? Yesu ogu owa Nazareesi amugambiire ku eiziina rye ari Simooni, yaahindura eiziina rye kuba Petero, ekirikumanyisa 'akabaare kakye” kandi yaamugambira n'eiziina ry'ishe.“

“Mpaho,” yaagira ati-yaagira ati, “Tindikumanya. Omuri Nazareesi nihabaasa kurugamu ekintu kirungi kyona?”

Yaagira ati, “Reka turekye kubigambaho; ija oreebe kwonka.” Ekyo n'ekiteekateeko kirungi, “Ija oreebe.”

N'ahabw'ekyo ngugwo Filipo yajja, areetsire Nasanaeli. Ku yaahikire aho, obundi Yesu akaba ayemereire, naagamba, obundi naashabira abarwaire omu runyiriri rw'okushabira abarwaire. Kandi ku yaahikire ahu Yesu yaabaire ari, Yesu yaahinduka yaamureeba, kandi yaagira ati, “Reeba Omwisraeli kashushu, otaine buryarya.”

57 Hati, noogira oti, “Mbwenu, n'ahabw'enjwara ei yaabaire ajwairemu.” Oo, ngaaha. Abantu boona ab'oburugwa-izooba bajwara okurikushushana. Akaabaire naabaasa kuba Omusiria, nari ari ondijo weena; ebireju, ebijwaro.

Yaagira ati, “Reeba Omwisraeli kashushu otaine buryarya,” amakuru gaakyo, “omuntu w'amazima, omwesigwa.”

Mbwenu, ekyo kikaba nk'ekyamaramu Nasanaeli omwika. Yaagira ati, “Rabi,” ekirikumanyisa, “mwegyesa.” “Rabi, okaamanya ryari? Waamanya ota ngu ndi Omuyudaaya? Waamanya ota ku ndi omwesigwa, otaine buryarya?”

Yaagira ati, “Filipo atakakwetsire, obu waaba ori ahansi y'omuti, Naakureeba.” Aa! Mailo ikumi na itaano okuruga aho, aha rundi rubaju rw'eihanga, ekiro kya ijo.

Akagamba ki? “Rabi, Ori Omwana wa Ruhanga. Ori Omugabe wa Israeli!”

58 Kwonka aho hakaba heemereireho abo banyamurwa, abanyamaryo, engangaazi, baagira bat, "Omushaija ogu ni Belezebuli, omuraguzi."

Yesu yaagira ati, "Ekyo Naakibasaasira."

Hati, mwijukye, tibarakigambiire ahaiguru, kwihamo bakakigambira omu mitima yaabo. "Kandi Akamanya ebiteekateeko byabo." Ekyo kihikire. Ekyo nikyo Baiburi erikugamba. Kyete okushoma ebiteekateeko by'ondi ku oraabe nooyenda, kwonka Aka-Akamanya ebiteekateeko byabo.

Kandi Akagira ati, "Ekyo naakibasaasira. Kwonka eizooba rimwe Omwoyo Orikwera naaza kwija akore ekintu nk'eki," ahanyima y'okugyenda Kwe; "Orimurogotaho, tarisaasirwa mu busingye obu n'obu bwakuba oburiija." Ekyo kihikire? [Abateeraine baagira bat, "Amiina." -Omur.] Hati, abo bakaba bari Abayudaaya.

Reero ekiro kimwe Yaahurira ashemereire kuza Samaria. Kwonka tutakakozire ekyo, tushangire omukazi, nari omu . . .

59 Omushaija ogu, obu yaabaire naaraaba omu irembo eririkwetwa Erirungi, owaatambiirwe. Yesu akaba naamanya embeera ye, yaamugira ati, "Yekorere engozi yaawe otahe omuka." Kandi yaakikora, yaakira.

Bwanyima nitushanga ngu, Abayudaaya, bamwe omuribo Bakamwakiira. Bamwe bakakiikiriza; abandi tibaakiikiriza. Ahabw'enki batarakiikiriize? Bakaba batatooraniirwe Amagara. Bakaba batari ekyo kicweka ky'ekimurimu.

Hati mwijukye, abo bakaba bari abanyamurwa kandi abantu b'amaani. Na Yesu . . . Teekateeka aha batendekirwe omu by'ediini abo n'abanyamurwa, abantu abu waabaire otarikubaasa kureebaho enhobie omu magara gaabo. Yesu akagira ati, "Muri aba shoimwe sitaane, kandi mukora emirimo ye." Yaagira ati, "Kuri muri aba Ruhanga, Mukaanyikiriize. Ku muraabe mutarikubaasa Kuunyikiriza, mwikirize e-mwikirize emirimo ei Nkora; niyo Empamya."

Hati, Baiburi ekagira eti, ngu, "Yesu tahinduka, oku abaire ari nyomwebazyo n'eriizooba nikwo ari, kandi nikwo ariguma ebiro byona." Yesu akagira ati, "Emirimo ei Nkora n'orikuunyikiriza nawe aryagikora." Ekyo kihikire? Yetegyereze, ogwo akaba ari Melekizedeki wenyini hati.

60 Hati yetegyereze, omurundi ogundi, hakaba hariho enganda ishatu zonka z'abantu.

Mukampurira ningamba ku ndi orikushoroora. Ndiwe. Abakristaayo boona n'abarikushoroora; batarikushoroora omu rangi, kwihamo okushoroora omu mwoyo. Erangi y'omuntu y'omubiri gwe taine kakwate nawe. N'omwana wa Ruhanga ahabw'Okuzaarwa. Kwonka Omukristaayo, Ruhanga akagira ati, "Muntooranire!" "Mubarugyemu," n'ebindi. We n'orikushoroora, oburofa, ahagati y'ekihikire n'ekigwire.

Kwonka yetegyereze, bakaba baine okushoroora obwire obwo, okushoroora omu nganda, abaabaire bari Abasamaria.

Kandi hariho enganda ishatu zonka z'abantu omu nsi; ku turaabe nitwikiriza Baiburi; ezo ni, abantu ba Haamu, Sheemu, na Yafeesi. Abo nibo baana bashatu ba Noa. Twena tukakomooka aho. Ekyo kihikire. Ekyo kitugarura twena enyima kuruga ahari Adamu, twena kitukora ab'eishe-mwe. Baiburi ekagira eti, "Ruhanga akahanga abantu b'omu mahanga goona okuruga omu shagama emwe." Twena turi eishe-mwe, okurabira omu shagama. Omukyotera naabaasa kuha omujungu eshagama, nari omujungu agihe omukyotera. Omujungu naabaasa kuha Omu-Omujapani, omuntu wa kinekye, nari Omuhindi, omuntu orikutukura, nari ondijo weena, nari owa Yafeesi, nari owaaboneka weena, naabaasa kumuha eshagama, 'habw'okuba twena twine eshagama emwe. Erangi y'omubiri gwaitu, ahi tutwire, tibiine kakwate nakyo.

Kwonka obu tushoroorwa, n'obu turuga omu nsi, nk'oku Yaihire Israeli omuri Misri. Obwo nibwo tushoroorwa kuruga omu bintu by'ensi.

61 Hati, bakaba bari abantu ba, Haamu, Sheemu, na Yafeesi. Kandi kuri twine obwire obw'okugaruka omu bukomooko enyima, noobaasa kureeba ahu aba Anglo-Saxon, ei baakomookire. Hati, abo bakaba bari Abayudaaya . . . Omusamaria, owaabaire ari Omuyudaaya ekicweka n'Omunyamahanga, abaashwerereine n'Abanyamahanga ahabw'obugobya bwa Balamu, na Moabu. Bakaba bari Abasamaria. Kandi hakaba hariho Abayudaaya n'Abanyamahanga.

Hati, itwe Abango-Saxon tukaba tutaine kakwate n'ebyo byona. Tukaba tutarikwiririza omuri Mesia weena, nari ekindi kyona. Tukaba tutaine ou tutegyereze. Tukareetwamu bwanyima.

Yesu akaizira Abe, kandi abaabaire bari Abe Tibaamwakiira. Kandi Akagambira Abeegi be ati, "Mutaza omu Banyamahanga, kureka mugyende omu ntaama ezaabuzire ez'Abaisraeli." Kandi Akaza omu ntaama ezaabuzire ez'Abaisraeli zonka. Kandi reeba, Akeeyoreka We wenka nk'Omwanwa w'omuntu, omu maisho g'Abayudaaya. Baamwanga.

Hati, Abasamaria, ahabw'okuba Abayudaaya ekicweka n'Abanyamahanga ekicweka, nabo bakaikiriza, kandi

bakaba bategyereize Mesia.

Tukaba Tutamutegyereize. Tukaba turi abatamanya Ruhanga, ebihuuzo biri aha migongo yaitu, nituramya ebishushani; Abanyamahanga.

62 Kwonka hati eizooba rimwe, omu kitabo kya Yohaana Orikwera 4, Akahurira ashemereire kuraba Samaria, omu rugyendo Rue kuza Yeriko. Kwonka Akaraba Samaria. Kandi ku Yaabaire naazayo, Yaashutama ahansi aha iziba aheeru y'etauni erikwetwa Sukaara. Kandi eiziba, ku oraabe oragiireyo, n'omwanya mukye ogurikushemeza amaisho ogurikwingana nka hanu. Kandi hariho eiziba ry'abantu boona, ery'amaizi, ahu boona baija. Kandi abakazi baija omu kasheeshe, baine enyungu zaabo z'amaizi, kandi bazita aha mitwe yaabo, n'endijjo ahari buri nyugunu, kandi bagyenda nazo kurungi nk'oku kirikubaasika, bataatsire n'obu ryakuba eitondo; nibagaaniira. N'ahabw'ekyo, nikwo baabaire bari, abantu nikwo baabaire baija aho.

N'ahabw'ekyo ezi zikaba ziri nka shaaha itaano z'omushana. N'ahabw'ekyo Akoohereza abeegi Be omuri tauni, kugura ebirikwetengwa, eby'okurya. Kandi ku baabaire bakiriyo . . .

63 Hakaba hariho omukazi owaariire enshoni. Nitubaasa kumweta, eriizooba, omukazi orikwemerera aha bitaara, nari maraaya. Akaba aine abashaija baingi munonga. N'ahabw'ekyo Yesu ku yaabaire ashutami aho, omukazi ogu yaija nka shaaha itaano. Mwareeba, akaba atarikubaasa kwija n'abaishiki abashugaine obu baija omu kasheeshe kutaha amaizi gaabo g'okwozya; akaba naateekwa kutegyereza okuhitsya obu boona . . . Bakaba batajwanga nk'oku barikukora hati. Akaba naamanywa. N'ahabw'ekyo, akaija kutaha amaizi, kandi yaakwata ekyoma ky'okwihiisayo amaizi, reero yaaboha omugoye aha nyungu, yaatandika kugishuumya.

Yaahurira Omuntu naagira ati, "Mukazi 'we, mpa eky'okunywa." Hati oijukye, ogu ni Melekizedeki. Ogu ni Yesu, oku abaire ari nyomwabazyo, Omwana w'omuntu.

Reero yaamagamaga, yaareeba Omuyudaaya. N'ahabw'ekyo yaagira ati, "Sebo, tikihikire Omuyudaaya kushaba Omusamaria ekintu kyona. Ndi Omusamariakazi, n'ahabw'ekyo Waashobya. Okaabaire otashemereire kumbuuza ekintu nk'ekyo. Titugira nkoragana."

Yaagira ati, "Kwonka kuri noomanya ogu orikugamba naiwe, Okambuurize eky'okunywa."

Omukazi yaagira ati, "Noogataha ota? Eiziba niriraingwa, kandi Toine ky'okutahisa."

Yaagira ati, "Amaizi agu Ndikuha n'Amaizi g'Amagara, agarikuhimintikira omu Magara Agatahwaho."

Akagamba nawe okuhitsya obu Yaamanyire embeera ye. Reero ni . . . Reeba eki Yaamugambiire hati ati, "Irooko oyete baro ogarukye aha."

Kandi yaagira ati, "Tinyine mushaija."

Yaagira ati, "Waagamba amazima, ahabw'okuba okashwerwa abashaija bataano, kandi n'ogwo ou oine hati tari waawe. N'ahabw'ekyo, omuri eki, waagamba amazima."

Reeba omutaano ahagati y'omukazi ogwo n'ekyo kibiina ky'abanyamurwa. Akaba naamanya bingi ahari Ruhanga okukira ekibiina ekyo kyona ky'abanyamurwa, obataire hamwe.

64 Yaagira ati, "Sebo, naayetegyereza Ku ori Nabi." Yaagira ati, "Twamara emyaka magana ana tutaine n'omwe. Hati, nitumanya ngu Mesia aryaija. Kandi Mesia ku ariija, ekyo nikyo Arikora." Ako niko kaabaire kari akamanyiso ka Mesia, ahakuba Akaba ari Omwana w'omuntu. Yaagira ati, "Ekyo nikyo Arikusa kukora ku Araije. Nooteekwa kuba ori nabi We."

Yaagira ati, "Niinye." Tihaine ondijjo owaakubaasize kugamba atyo.

Akatsiga aho egyo nyungu y'amaizi kandi yairuka yaaza omu rurembo, kandi yaagira ati, "Mwije, mureebe Omuntu Owangambira ebi naakozire. Ogu tiwe Mesia wenyini?"

Hati mwijukye, Akaraganisa kukora ekintu nk'ekyo aha muheru gw'oruganda rw'Abanyamahanga.

Abayudaaya bakaba baatungire emyaka enkumi ina y'okutegyereza Mesia ogwo, emyaka enkumi ina y'okwegyesibwa ngu Aryaija, n'eki Arikora Yaahika aho, kwonka baaremwa Kumwetegyereza, nari bakaremwa kukyetegyereza. Kandi ku Yaayemanyiise omu migambire ya Baiburi yonyini ei yaagambire ngu Naija Kwemanyisamu, obu Yaabaire ari omu mubiri gw'obwaruhanga reero bwanyima akaba omuntu akatuura nabo, bakaremwa kukyetegyereza, kandi baayeta emirimo Ye emirimo ya sitaane.

65 Hati tutungire emyaka enkumi ibiri y'okwegyesa, kurabira omu Kanisa Enkatorika ya Rooma, ahanyima y'entumwa. Reero twaraba omu Bakatorika ba Rooma, Abagriika, n'abandi, kugumizamu kushuma omu busingye bwa Luteeri, na Wesili, n'abandi boona, okuraba omu bigombe by'amadiini magana mwenda ebitarikushushana. Omu busingye obu bwona, bakatunga okwegyesibwa.

Hati Akaraganisa ngu, obwire bw'emperu butakahikire, ekishushani kya Sodoma na Gomora nikiza kugaruka

kibeho, "Nk'oku kyabaire omu biro bya Sodoma, nikwo kiriba n'omu kwija kw'obwire bw'emperu, Omwana w'omuntu naija Kweshuuura We wenka omurundi ogundi." [Akacweka k'orutambi rw'amaraka akariho busha - Omur.]

"Hatsigaire omwanya mukye ensi okutandeeba bundi; kwonka imwe Muryandeeba, ahabw'okuba Ndy'a," naayegambaho, "Ndyaba ndi hamwe naimwe, ndi omuriimwe, okuhika aha kumariira, aha muheru gw'ensi. Ndyaba ndi hamwe naimwe." Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Mwareeba?

Mwareeba, ogwo Omusamaria akaba ari, omu mazima, okuruga omu kubuurira kwangye kw'ekiro kya nyomwabazyo, akaba ari Hagari, mwareeba, ekirikushushanisa ekikiikami. Omuyudaaya akaba ari Saara, nari ba-Saara. Kwonka Omunyamahanga n'owa Mariamu, Oruzaaro rw'Obukama, Oruzaaro rw'Obukama rwa Abrahamu.

66 Hati kiraganisiibwe ku omu biro ebi eby'aha mperu, ngu, Ruhanga ogu niwe omwe, Kristo ogu niwe omwe, naija kugaruka hanu kandi Ayeshuuure nk'Omwana w'omuntu.

Ahabw'enki? Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Kandi ku Araabe yaarekire Abayudaaya abo kugyenda batafubiirwe, kandi yaabahaire akamanyiso ka Mesia, reero akahika aha muheru gw'okwegyesa kw'Abanyamahanga reero akabareka bakataahamu ahabw'enyegyesa y'ebi'ediini kwonka, naaba Atari ow'oburingaaniza. Naateekwa kukora ekintu nikyo kimwe, ahabw'okuba Baiburi ekagira ngu, omu . . . Abaheburaayo 13:8, "Tahinduka."

Kandi Akaragaanisa omuri Malaki 4, n'Ebyahandiikirwe byona ebitari bimwe, ngu, omu biro eby'aha mperu, ekanisa ekaba neija kuba eri buzima nk'oku eri ebiro ebi, kandi n'ensi nikwo erikuza kuba eri.

Reeba ensi eriizooba. Reeba egoy mbeera ya Sodoma. Reeba emitsitsa omu myanya mingi, n'ebantu ebirkubaho. Reeba ekanisa n'omuzambaaro ogu erimu, ogwa Babulooni. Reeba entumwa yaayo, Oral Roberts na Billy Graham.

G-r-a-h-a-m, omurundi gw'okubanza ogu turatungire entumwa, aha makanisa goona, ou eiziina rye ririkuhereeruka na h-a-m, nka Abraham. A-b-r-a-h-a-m n'enyuguta mushanju (omu rungyereza). G-r-a-h-a-m n'enyuguta mukaaga. Ari nkahi? Ari omu nsi. Mukaaga n'enamba y'omuntu. Omuntu akahangwa aha kiro kya mukaaga. Kwonka mushanju n'enamba ya Ruhanga.

67 Hati bareebe eifo okwo omuri Sodoma. Mbabo entumwa zaabo eifo okwo nibagamba nabo. Kwonka orwo Ruzaaro rw'obukama rwa Abrahamu ruri nkahi? Akamanyiso k'abo kari nkahe, aku Yaagambire? "Nk'oku kyabaire omu biro bya Sodoma," Ruhanga ogwo akaija aha nsi yaayeyoreka omu mubiri gw'omuntu, kandi yaagamba ebi Saara yaabaire naateekateeka enyima omu mutima gwe, omu ihema enyima Ye, akamanyiso k'aha muheru ensi y'Abanyamahanga etakahwerekyereziibwe n'omuriro. N'Ekanisa etungire akamanyiso kaayo k'aha muheru ensi yoona etakahwerekyereziibwe, obugabe obu obw'Abanyamahanga nibuza kuhwerekyerezibwa n'omuriro n'ekiniga kingi kya Ruhanga. Ekyo nimukiikiriza? [Abateeraine baagira bati, "Amiina." -Omur.]

Melekizedeki ogwo akaba omuntu, Ayejwekeyeire omu mubiri gw'omuntu; reero bwanyima Yaaba omuntu. Kandi hati, ekiro eki, Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Nimukiikiriza? [Abateeraine baagira bati, "Amiina." -Omur.]

Mbwenu, Melekizedeki ogu n'oha, ogwo otahinduka, oku abaire ari nyomwabazyo n'eriizooba nikwo ari . . ."Otakagiraga ishe, otakagiraga nyina; Takagiraga butandikiro bw'amagara, Takagiraga bugarukiro bw'amagara." Kandi Akabugana Abrahamu, kandi ni kamanyiso ka muringo ki aku Yaakozire? Reero ku Yaabaire omuntu, Akagira ngu kiragaruka kibeho omurundi ogundi emperu etakabaireho. Ekyo nimukiikiriza? [Abateeraine baagira bati, "Amiina." -Omur.] Ninkiikiriza. ["Amiina."]

Ka tushabe.

68 Ruhanga Omukundwa, niinyikiriza Ebyahandiikirwe, ku Ogambire ngu ori, "otahinduka, oku obaire ori nyomwabazyo n'eriizooba nikwo ori, kandi nikwo origuma ebiro byona." Kandi buzima omu mutima gwangye, Mukama, nimmanya ngu hariho ekirikwenda kubaho. Tindikubaasa kukimanya kurungi. Nyine obwoba bw'okugira eki naagamba kyona, Mukama. Noomanya omutima gw'omuheereza Waawe.

Kandi n'emirundi engahi, omu busingye bwona obu Oyohereza ebintu, abantu bakaremwa kubyetegyereza. Omuntu obutoosha asiima Ruhanga ahabw'ebi Yaakozire, kandi agamba ebi Arikukora kukora oku biri bikuru, kwonka beehuzya ebi Arikukora. Nikwo kitwire kiri omu busingye bwona. Ahabw'enki ekanisa ya Rooma yaaremirwe kwetegyereza Orikwera Patrick nka nabi wa Ruhanga? Ahabw'enki baitsire Joan owa Arc kunu yaabaire ari-ari nabikazi, bakamwotsya nk'omurogi? Taata, obutoosha biba ebyahingwire. Obishereka abanyabwengye n'abarikwetegyereza. Tikiriky'okutangaaza Okagambira abanyamurwa abo oti, "Mwombeka ebituuro bya baanabi, kandi niimwe mwabatairemu." Ku bamara kurugaho, bamanya enshobi yaabo. Obutoosha Bakuhiiiga, Mukama, omuri buri muringo ogu Oijamu.

69 Ninshaba, ekiro eki, Ruhanga, omurundi gumwe gwonka. Nyencakare nitutebeekanisa kuba . . . kuza Tucson.

Ebicweka ebindi eby'ensi, endembo ezindi ezi tushemereire kubuuriram. Kwonka, Ruhanga Omukundwa, nihabaasa kuba hariho abagyenyi hanu ekiro eki abataka . . . Barahuriire ebigambo nibibuirirwa, kwonka tibakareebaga Nibihamibwa.

Nk'oku Naakushaba omu kutandika. Obu abeegi abo, Kuleopa na munywani we, nibaruga Emau, bakaba nibagyenda omu muhanda, kandi Waaruga omu kishaka reero waatandika kugamba nabo, ahanyima y'okuzooka, waababuurira. Ahabw'enki, Akagira ati, "Imwe bashema 'mwe, ab'emitima etarikurahuka kwikiriza. Timurikumanya ngu Kristo kikamushemerera kubonabonesibwa ebi byona, n'okutaaha omu kitinisa Kye?" Kwonka nabwo bakaremwa kukyetegyereza. Bakagyenda Naiwe eizooba ryona, kwonka nabwo baremwa Kukumanya. Kwonka ekiro kimwe . . .

Obwire ku bwaizire, Baakugyemesereza kutaahamu. Ku baataahire omu nju nkye y'abagyensi baakinga enyigi, bwanyima Waakora ekintu nk'oku Waakikozire Otakabambirwe, kandi baayetegyereza ku ni Kristo ozookire. Omu kaanya kakye Okaba waahikire enyima y'entimbe waerugireho. Ahonaaho bakairuka kandi baagambira abeegi bat, "Mukama azookire buzima!"

Taata, Ruhanga, niinyikiriza ku Okiri ohuriire. Nimmanya ku Ori ohuriire. Kandi Okituhamiize emirundi mingi. Noobaasa Kugaruka kukturukorera omurundi ogundi, Mukama? Ku turaabe twagirirwa embabazi omu maisho Gaawe, reka kibeho omurundi ogundi. Ndi omuheereza Waawe; aba n'abaheereza Baawe omunda hanu. Mukama, byona ebi naagamba tibiine kihango eki birikubaasa ku . . . Ekigambo kimwe kyonka kuruga Ahariiwe nikikira byona ebi ngambire omu biro bitaano ebi, nari obutumwa butaano. Nikibukira, ekigambo kimwe kyonka okuruga Ahariiwe. Togamba, Mukama, nikwo abantu bakamanya ku mbagambiire Amazima? Kituhe, Ruhanga. Ninkishaba omu Iziina rya Yesu, omurundi ogu gumwe gwonka. Amiina.

70 Hati, tindikubamanya. Nimmanya abantu bamwe. Nimmanya omwojo ogu oshutami hanu. Nimmanya Bill Dauch oshutami hariya. Niinyenda ku . . . Hanu hariho Ow'eishe-emwe Blair, Rodney Cox. Kigumire kureeba okwo.

Aha rubaju oru, omu bwire obu bwonyini tihaine muntu weena ou ndikureeba, buzima, ou ndikumanya.

Hati nibangahi hanu abarikumanya ngu ndi omugyenyi ahariimwe? Mwimutsye emikono yaanyu, abarikumanya ngu tinyine eki ndikubamanyaho, mwimutsye emikono yaanyu embaju zombi.

Nibangahi hanu abaine ekibashobireho, nari ekintu eki orikumanya ngu tindikukimanya? Nimubaasa kwimutsya emikono yaanyu.

Hati, kikaabeera kimwe, buzima ekitarikubaasikira kimwe na kakye nyowe kumanya ekintu kyona ahariiwe. Oihireho ekyo, obwo, nikiba kirugire aha kushuuuruurirwa kw'Omwoyo.

Kandi nk'oku mbagambiire ebiro ebi byona, n'ekiro eki, ku Atafire; Ari hanu, kandi akaraganisa kukora ekintu nikyo kimwe. Kandi Akaraganisa ngu haryabaho obwire omu biro by'aha mperu, okurugiirira ahari Malaki 4 n'okurugiirira ahari Luka Orirkwera, ngu Aryareebeka omurundi ogundi omu nshusha y'omuntu omu bantu Be kandi akore ebintu nibyo bimwe, kandi ashuuuruure ebintu nibyo bimwe, akamanyiso niko kamwe ka Mesia. Nibangahi abarikumanya ekyo, imwe abashomi ba Baiburi, abarikumanya ku ago gari Amazima? Mugire muti, "Amiina." [Abateeraine baagira bat, "Amiina." -Omur.] Mwena nimuteekwa kuba muri abashomi ba Baiburi.

Hati, nimmanya ngu n'ekintu kisyah aha bantu ebiro ebi, kwonka nabwo n'Amazima. Niyo nshonga eyaatumire bataamanya Yesu owa Nazaaresi. Bakaba nibamanya enyegyesa z'amadiini gaabo, kwonka Tibaramumanyire. Kwonka Akaija omu muringo ogu Baiburi yaagambire; atari omukugu omu by'ediini, atari omunyamurwa. Akaija nka Nabi, kandi abaabaire bari Abe tibaamwakiira.

71 Hati, Ruhanga ku araarinde Ekigambo Kye, kandi ku nda . . . ku kyakubaho kikaza aha muntu ou ndikumanya, obwo ninza-ninza kulkwata omuntu ondiijo. Mwareeba, niinyenda omuntu ou ntarikumanya. Kandi niinyenda ngu mushabe.

Hati, mureebe, hakaba hariho omukazi mukye rimwe owaabaire aine oburwaire. Akaba amariire esente ze mu bashaho; tibaabaa kumuhwera. Reero yaagamba omu mutima gwe ati, "Ku naakubaasa kulkwata aha kijwaro ky'Omushaija ogwo, ninza kulkira." Nimwijuuka ekitebyo ekyo? N'ahabw'ekyo boona bakagyezaho kumugarura enyima, kwonka akagyemesereza okuhitsya obu yaakwatsire aha kijwaro Kye, yaagaruka enyima yaashutama.

Hati hurikiza kurungi. Bwanyima ku Yaakozire ekyo, omukazi ogwo ku yaakozire ekyo, Yesu akahinduka yaagira ati, "N'oha owankoraho?"

Ahabwenki, Petero entumwa Akamukabukira. Naabaasa kuba yaagambire ekintu nk'eki, "Mukama, reka kugamba ekintu nk'ekyo. Abantu nibaija kwikiriza ngu hariho Elikushobireho. Ahabw'okuba, obu Waabagambiire kurya omubiri Gwawe n'okunywa Eshagama Yaawe, bakateekateeka ngu hariho ekintu ekishobire. Kandi Noogira ot, 'Owankoraho n'oha?' Ahabw'enki, omutwe gw'abantu gwona nigukukwataho."

Yaagira ati, "Eego, kwonka Naahurira amaani Gandugamu." Okwo kukaba kuri okukwataho kw'omutaano. Hati, omuntu weena naamanya ngu amaani nikimanyisa "okubaasa." Naahwa amaani; amaani Gandugamu."

Kandi Yaamagamaga omu mutwe gw'abantu okuhitsya obu Yaaboine ogwo mukazi mukye, kandi yaamugambira eby'ekyejwiso kye. Kandi omukazi akahurira omu mubiri gwe ku ekyo kyejwiso kyakira. Ekyo kihikire? Kandi Yaagira ati, "Okwikiriza kwawe kwakukiza."

Hati, ekigambo ky'Orugriika aho ni sozo, buzima ekirikumanyisa "kujunwa," omu mubiri nari omu mwoyo, nikyo kimwe. We "akajuna." N'O-N'Omujuni waawe.

72 Hati, ogwo ku araabe yaabaire Ariwe nyomwabazyo, kandi omuringo ogu Yaakoziremu, kuhamya ku Yaabaire ari omu bantu, Mesia owaarananisiibwe; kandi okwo nikwo Yaayeyorekire, kandi akaraganisa omuri Baiburi, ngu Naaza kukora ekintu nikyo kimwe obwire obu; Tarikuza, Tarikuteekwa kukora ekintu nikyo kimwe?

Noogira oti, "Akagamba aha kutambira abarwaire?" Eego!

Abaheburaayo, Baiburi ei naamara kushomamu, ekagira ngu, "Yesu Kristo hati n'Omunyamurwa Omukuru waitu orikubaasa kusaasira hamwe naitwe omu bweremwa bwaitu." Nibangahi abarikumanya ekyo ku n'amazima? [Abateeraine baagira batii, "Amiina." -Omur.] Baiburi ekakigamba. "N'Omunyamurwa Omukuru hati orikubaasa kusaasira hamwe naitwe omu bweremwa bwaitu." N'ahabw'ekyo ku Araabe niwe Omunyamurwa Omukuru ogwo ow'obwire obwo, Akaatwaize ata hati? Akaatwaize omu muringo nigwo gumwe nk'oku Yaatweize buriya, ku Araabe niwe Omunyamurwa Omukuru ogwo omwe. Hati, noobaasa . . .

Nyowe tindi Munyamurwa Omukuru waawe. Noobaasa kunkwataho, kibe nk'okukwata ahari baro, nari murumuna waawe, nari ekindi kyona, omuntu.

73 Kwonka reka okwikiriza kwawe Kumukwateho, haza orebe ekiraabeho. Hati, ku ndaabe ndi omuheereza wa Ruhanga kandi naabagambira Amazima, Ruhanga naija kuhamya ekyo ku n'Amazima. Kandi ekyo nikiza kuhamya ku Yesu Kristo ari ohuriire ekiro eki, ayemereire hanu. Ekyo kihikire? [Abateeraine baagira batii, "Amiina." -Omur.]

Hati, mugire okwikiriza, orubaju rumwe obwire bumwe, orubaju rumwe. Mugire okwikiriza aheeru aho. Reka ngume aha muzindaaro hanu, ahabw'okuba tibarikubaasa kumpurira.

Hagire omuntu owaahanga amaisho Ruhanga kusha, agire ati, "Ruhanga, omuntu ogwo tarikuumania. Taine eki arikuumanyaho. Ndy'omugyeniyi buzima ahariwe. Kwonka reka okwikiriza kwangye Kukukwateho, Mukama. Kandi noomanya emirabanamu yangye, Mukama. Noomanya byona ebirikunkwataho. Noomanya eki ndi, omu muringo nigwo gumwe ogu Waamanyiremu eki Petero yaabaire ari, omu muringo nigwo gumwe ogu Waamanyiremu Nasanaeli, oku Waamanyire omurabanamu gw'omukazi owaabaire arwaire ekyejwiso. Kandi omushaija ogu nangambira ngu 'Tohinduka, oku obaire ori nyomwabazyo n'eriizooba nikwo ori, kandi nikwo origuma ebiro byona.' N'ahabw'ekyo, Mukama, reka okwikiriza kwangye Kukukwateho.

Kandi ku Araakore ekyo, hatariho okuremwa kwona Akeeyoreka We wenka hanu, nibangahi omuriimwe abaraije Kumwikiriza n'omutima gwanyu gwona; ku Araakikore nangwa aha muntu omwe, nari babiri, nari bashatu, aha-ababw'obujurizi? [Abateeraine baagira batii, Amiina." -Omur.] Ruhanga abahe omugisha.

74 Hati, Taata Ruhanga, buzima eki tikiri omu mikono y'omuntu weena. Nikiza kuba ekirikutangaaza ekirengire eby'obuhangwa. N'ahabw'ekyo ninshaba ngu ompwre hati, Mukama. Ndi omu mikono Yaawe. Nkozesha oku Orikureeba kishemereire. Omu Iziina rya Yesu. Amiina.

Hati, reka kweraarikirira. N'obucureezi, n'okwebundaaza gira oti, "Mukama, ninja Kukuheereza. Kandi ago nigaza kuba amazima, ngu, ku ndaabaase kukwata aha kijwaro Kyawe, obwo Ogambe naanye kurabira omu muntu ogwo. Ekyo nikija kumpamiza ku eki agambire gari Amazima." Ekyo kihikire?

Nibangahi abarareebireho ekishushani ky'Ekyererezi ekyo? Kiri hoona omu ihanga, hoona hoona. Sayansa ekitware yaakishwijuma, na hoona hoona. Hati, Ari hanu honyine hati hati; Ogwo omwe owaagambire aha Bushwere n'Okushenda, Ogwo ogwo owaabaire ari aha rushozi, owaatengyeitse enshozi enyima okwo, Ogwo omwe owaabaire ari eifo hanu aha mugyera omu mwaka gwa 1933, Ogwo otahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Tahinduka.

75 Hati, hariho omukazi, kandi yaayetegyereza hati ku hariho ekyabaho. Ekyo Kyererezi nikizeereera ahaiguru ye honyini. Ashutami hanu honyine, ajwaire eshweta ya guriini, nari ekindi kintu. Tindikumanya omukazi ogu. Ninteekekateeka ngu torikuumania naanye tindikukumanya. Ekyo kihikire. Noikiriza ngu Ruhanga . . . Oine-oine eki orikwetenga, mbwenu noikiriza ngu Ruhanga naabaasa kunshuuruurira omurabanamu gwawe? Kandi ku Araakikore, obwo noomanya ngu nigateekwa kuba gari amaani agarengire eby'obuhangwa, ahabw'okuba tindikukumanya. Nikiza kwija okurabira omu birengire eby'obuhangwa.

Nikirugiirira aha ki orikukiteekateekaho. Noobaasa kuza aha rubaju rw'abanyamurwa, okyete "sitaane," nari noobaasa kuza aha rubaju rw'omwikiriza okyete "Ruhanga." Eki oraikirize omuri ebyo, aho niho ebihembo byawé birikuza kuruga.

Ruhanga ku aranshuuruurire ekirikukwita kubi, nooza Kumwakiira nk'e-nk'eky'okurihiirira kyawe ahabw'ekirikukwita kubi ekyo? Tindikumanya ekirikukwita kubi ekyo. Kwonka nimmania, kandi naiwe

noomanya, ngu hariho ekirikugyenda omu maisho.

Hati, hati reka nkugambire oku orikwehurira, obwo nooza kumanya; okwehuriram u obugwagye, oburungi, n'okutagatirwa. Ninkireeba kurungi buzima. N'Ekyererezi ekyo, Ekyererezi ekirikushushana nk'omuringa ogurikwengyengyeta ogweziibwe nikizeereera ahaiguru y'omukazi ogu.

Kandi omukazi ogu arwaire endwara omunda ye. Ni nk'ebizimba, nkabyo, omunda ye. Ti wa hanu. [Ow'eishe-emwekazi yaagira ati, "Kihikire."] Ngaaha. Okuruga hanu okuhika owaanyu ni hare tikwo? Ekyo kihikire. Nooruga Wisconsin. Ekyo kihikire? Buzima. Hati waakira. Okwikiriza kwawe kwakukiriza kimwe.

Hati ngambira Ou omukazi ogu yaakwataho? Ndi yaadi makumi abiri na itaano okuruga ahu ari. Yaakwata ahari Yesu Kristo, Omunyamurwa Omukuru. Nimukiikiriza? [Abateeraine baagira bati, "Amiina." -Omur.]

76 Nindeeba omukazi ou ngambire nawe. Omukazi ogu, niimureeba kurungi. 'habw'okuba naashabira munonga omushaija. Angambiire ngu aine omushaija . . . Taine na kakye eki akingambiireho.

Kwonka eiziina rye ni, Muky. Waldrop. Naaruga Phoenix. Akazooka omu bafu, kandi omushaho we akareeta za x-ray yaayoreka ekookoro omu mutima. Akafeera omu runyiriri rw'ab'okushabirwa. Hahweireho obwire oburikwingana ki, Muky. Waldrop? Emysaka ikumi na munaana ehwiring, kwonka ngugwo ashutami aho ekiro eki, obujurizi obuhuriire. Omushaho we akaija omu ruteerano, yaareeta . . . yaagira ati, "Omukazi ogu naabaasa ata kuba ohuriire?" Kwonka ngugwo aho, kandi taine kabonero kaayo koono.

Aine omuntu ou areetsire, kandi naamushabira. Hati, ariyo naafa, n'oburwaire bwa sukaari. Hati ekyo mbaire ninkimanya. Kwonka ahabw'okuba oriyo nooshaba . . . Noomanya ngu tindikumumanya, Muky. Waldrop.

Naaruga Missouri, kandi eiziina rye ni Omw. Cooper. Ekyo kihikire. Hati, iwe ikiriza, noobaasa kugaruka omuka kandi obe kurungi, sebo. Kiri ahariiwe, ku oraakikirize.

77 Hanu hariho omukazi, arwaire obuhiima, bwewongyeire. Ti wa hanu. Ashutami aho omu mutwe gw'abantu, aho honyini. Nyine amatsiko naatunga . . . Ti wa hanu. Naaruga Georgia. Omwishiki McKenny. Noikiriza n'omutima gwawa gwona, kandi noikiriza ngu Ruhanga naaza kukukiza? Yemerera aha bigyere byawe, ku oraabe otarikuumanya kandi ekyo n'amazima. Yesu Kristo yaakukiza. Noikiriza?

[Ow'eishe-emwe Branham yaateera amabega abateeraine -Omur.]

Enyima yangye, hariho omushaija oshutami enyima yangye. Naashaba Ruhanga. Kandi eki arikwenda; aine omwerekere orwaire omutima. Kandi omwerekere ogwo aine okuhiriita omu mutima gwe, nikwo omushaho agambire. Eiziina ry'omushaija ogwo ni Omw. Cox. Yemerera, Omw. Cox. "Kandi Akagambira Saara eki yaabaire naateekateeka, enyima Ye."

[Ow'eishe-emwe Branham yaaguma ateire amabega abateeraine -Omur.]

Aharubaju ruri rw'akahanda ka rwagati y'entebe kuruga ahu ari, enyimaho kakye, hariho omuntu otarikuruga hanu, kureka naaruga New Mexico. Tinkamureebaga, omu magara gangye. Niimureeba kurungi hati, kandi ari enyima yangye. Naaruga New Mexico. Kandi omushaija ogu aine omuhara ou ari kufaho, kandi omuhara aine ekishobire omu kanwa ke. Ni . . . Enkaanka y'omu kanwa ke niyo erwaire. Eiziina ry'omushaija ogu ni Omw. West. Noobaasa kwemerera, sebo. Tindikumumanya na kakye, kwonka Mukama Ruhanga naaza kutambira omwana we.

78 Nimwikiriza hati n'omutima gwanyu gwona? [Abateeraine baagira bati, "Amiina." -Omur.] Nibangahi omuriimwe abarikwikiriza hati n'omutima gwanyu gwona? ["Amiina."] Hati, Yesu Kristo t'otahinduka, oku abaire ari nyomwabazyo, n'eriizooba tikwo ari, kandi tikwo ariguma ebiro byona? [Amiina.] Nimumwakiira hati nk'Omujuni waanyu? Mwimutsye emikono yaanyu. ["Amiina."] Nimumwikiriza nk'Omumtambi waanyu? ["Amiina."]

Hanu, hanu hariho omuntu oshutami hanu, n'ekimuga nari ekindi kintu, abyami omu ngozi. Noobaasa kumpurira okurabira omu muzindaaro ogu? [Ow'eishe-emwe Branham yaatwara omuzindaaro yaagyenda yaaza aha rubaju rw'ekituuti yaagamba n'omukazi ori omu ngozi -Omur.] Tindikukumanya. Ori omukazi orambiire aho kwonka. Kuri nimbaasa kukutambira, nkaakikozire. Tindikubaasa kukutambira.

[Omushaija yaatandika kurira -Omur.] Nikirungi. N'omushaija orikwesiima kwonka. Omwana we atambiiirwe.

Tindikukumanya. Ori omukazi, kandi ndi omushaija. Ogu nigwo murundi gw'okubanza ogu twabugana omu magara, ninEEKATEEKA. Abantu aba . . . ? . . . abakureetsire. Omu mazima, ogu n'omurundi gwawa gw'okubanza hanu; nibwo baakureetamu hati. Nooruga hare. Ekiucuucu kya rufu kikuriho. Oine ekookoro. Ti bumuga. N'ekookoro. Abashaho tibarikubaasa kukukorera ekindi kyona. N'amazima. Kandi buzima nooza kufa; abo bashaho tibarikubaasa kukukorera ekindi kyona.

Rimwe hakaba hariho ababembe bashatu bashutami aha irembo rya Samaria. Kandi ababembe abo baagira bati, "N'enki ekitushutamiise aha, kuhitsya obu turaafe?" Ahabw'okuba, oburwaire bwona, okwitwa enjara, na buri omwe kurya omwana w'ondijjo. Baagira bati, "Ku turaaze eifo omu rusiisira rw'abazigu, abo Basiria; ku

baraatwite, nabwo twafiire. Kandi ku baraaturekye, nituza kugumaho.” Kandi bakakozesa omugisha ogwo. Kandi ahawb'okwikiriza okwo, tibareejunire bonka kureka bakajuna n'ekibiina kyona.

Hati, nooza kufa ku oraabyame aho. Kwonka torikushabwa kuza omu rusiisira oru baagiiremu. Kureka nooyetwa kutaaha omu nju ya Tata, . . . ? . . .

79 Ekokoro eriyo neekwita. Atari Ruhanga torikubaasa kugumaho. Tori w'omu tauni egi. Tori w'omu bicweka bya kunu. Nooruga hare. Nooruga Milwaukee. Ago n'amazima. Ekyo kihikire. Naareeba orurembo. Nindumanya. Ekyo kihikire.

Noikiriza? Nooyakiira Ruhanga hati nk'omutambi waawe? Ku oraabe noomwakiira, n'obu oraabe oine amaani makye gata, orembeire omu kitanda ota, niinyikiriza, omu mbeera yaawe, nkaimukire omu Iziina rya Yesu Kristo. Kandi nkwata engozi egyo ntaaha omuka, reero mbaho ahawb'ekitiinisa kya Ruhanga. Nooza kuunyorobera, nka nabi wa Ruhanga? N'ahabw'ekyo imuka ogyende, kandi obe gye. Obe gye! Reka kugira obwoba. Imuka orugye omu ngozi; Ruhanga naaza kukukiza. Waareeba?

Haagire omuntu owaamukwatirira abaase kwimuka atungye amaani. Noikiriza Ruhanga? Murekye atungye amaani makye; naaza kuba gye. Nikyo ekyo, munyaanyazi. Reeba ngugwo, omu Iziina rya Mukama Yesu! [Abateeraine baayesiima obu ow'eishe-emwekazi hati yaayemerera.]

Reka twemerere tuhimbise Ruhanga. Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona! [Abateeraine nibeesiima munonga kandi nibahimbisa Ruhanga -Omur.]

Gyenda, Mukama Yesu Kristo akuhe omugisha. [Abateeraine baagumizamu nibeesiima munonga kandi nibahimbisa Ruhanga -Omur.]



www.messagehub.info

Obutumwa obu bukabuuirirwa
William Marrion Branham
 “... omu biro by'eiraka ...” Kush 10:7